

دكتور / وحدى زيد

الفرعون الأخير

الناشر

دار فرحة للنشر والتوزيع

أجيال لخدمات التسويق والنشر

الفرعون الأخير

مسرحية في فلسطين

أ. د. وجدى زيد

الفرعون الأخير

المؤلف

الأستاذ دكتور / وحدى زيد

الناشر

دار فرحة للنشر والتوزيع

أحيال لخدمات التسويق والنشر

٣٢٠ عمارات العرائس شارع السودان - المهندسين ت : ٠٢/٣٤٧٤٠١٠

٢٨ شارع عدنان المالكى : المنيات ٠٨٦/٢٣٦٣٠٧٩

٠١٠١٨٨٩٣٦٣ / ٠١٠٢٥٨٢٠٩٥ / ٠١٠١٦٦٨٣٩٩


الاخراج الفنى

قسم التجهيزات بدار فرحة للنشر

وأحيال لخدمات التسويق والنشر

رقم الإيداع : ٢٠٠٥ / ٥٦٤٨

الترقيم الدولى : 977-6063-50-0



الخروج من التاريخ

هذا بلاغ أقدمه عن جريمة ارتكبتها العالم ضد مصر والمصريين عن عمد وبشكل منظم على مدى آلاف السنين ، جريمة شارك فيها كل من غزا مصر واستعمرها ، أنا لا أتحدث عن آثار مصر المنهوبة التي تزهو بها وتترين متاحف لندن وباريس ونيويورك وغيرها من متاحف العالم ، ولا أتحدث عن مصادر مصر وخيراتها التي اغتصبها المستعمرون وإنما أتحدث عن جريمة أكثر بشاعة وقسوة : لقد سرق الغزاة المستعمرون العقل المصرى وانجازاته عبر عصور طويلة وأجبروا مصر والمصريين على الخروج من التاريخ فى النهاية، ودفعوا فيها الإنسان المصرى إلى نفق طويل مظلم أجبر فيه العقل المصرى على أن ينسى أنه كان يا ليس فقط معلم الإنسانية ، بل إنه صاحب الحضارة الوحيدة التي دفعت الخيال والطموح الإنسانى إلى قمم لم تعرفها حضارة أخرى .

يقول ت . إس . إليوت إن الحضارة الغربية تبدأ بالإغريق ، والمعنى هنا واضح : كل عبقرة الفكر الإغريقى -

هوميروس وأفلاطون وأرسطو وأسيكيوس وسوفوكليس وغيرهم- ينتمون إلى الغرب ، إليوت بهذا يستعد أساتذة هؤلاء العباقرة ، إنهم المصريون الذين علموا الإغريق كل شيء ، وكانوا حقاً أطول قامة من هؤلاء العمالقة ، يقول التاريخ إنه قبل ظهور مكتبتى الإسكندرية وأثينا ، استطاعت مصر وحضارتها أن تصل بكل قنوات الفكر الإنسانى إلى أقصى درجات التطور ، وأن تصل بالعلوم والفنون إلى قمة التخصص والازدهار التى نضجت واكتملت فيها فنون الشعر والنثر وغيرها من الفروع ، وعندما جاء الإغريق إلى مصر بعد عام ٣٣٢ قبل الميلاد اغتصبوا - مثل كل غاز مستعمر - ليس فقط الأرض ولكن أيضاً كل ثروات وإنجازات عقل المهزوم ، وأجبروا المصريين على أن يفقدوا ذاكرتهم كمعلمين وأساتذة لأن الأستاذية والتعليم سمات سيادية تخاصن المنتصر فقط . هكذا بدأ الإغريق جريمة تزيف التاريخ التى استمرت حتى وقتنا هذا ، تلك كانت بداية الجريمة التى يقدم إليوت وبطريقته الخاصة تعريفا لها !!!

لم يكن ما اغتصبه الإغريق من المصريين ، وبنى عليه الغرب والعالم حضارته التى يفاخر بها الآن ، مجرد بدايات بسيطة أو أصول فجة ، فهذا - مثلاً - الكاتب الأمريكى هارولد

بلوم ، أشهر من كتب ومازال يكتب فى التأثير والتأثير حتى
الآن، يستعير مقولات لكاتب مصرى قديم ليكشف غموض
العلاقة بين القديم والجديد فى الفن والأدب ، الكاتب المصرى
هو خاخيبيريسنب ، الذى يجب أن نحفظ اسمه ونباهى به مثلما
نباهى ونتشدد بأسماء نقاد الغرب ، يقول خاخيبيريسنب :
" باليت عندى عبارات لا يعرفها أحد ، غريبة ، فى لغة
جديدة لم يقلها أحد ، ولم تستهلك ؛ لكنها عبارات قالها
الأقدمون !"

أليس هذا بالضبط ما قاله إليوت نفسه فى مقاله الشهير " التراث
والموهبة " عندما أراد وصف الماضى والحاضر فى العلاقة بين
القديم والجديد ؟! ، بل إننى يمكننى أن أضيف فى اطمئنان أن
عبارة خاخيبيريسنب أجمل وأدق من مقالة إليوت كلها !

على أن هذه العبارة التى قالها الكاتب المصرى القديم
منذ أكثر من ألفى عام قبل الميلاد تؤكد على حقيقة هامة ، ففيها
يتحدث خاخيبيريسنب عن " الأقدمين " مما يعنى أنه جاء بعد
سنتين طويلة سبقتة من الإبداع، والمعروف علميا الآن أن قضية
التأثير والتأثر فى الأدب الإنجليزى لم تأخذ كل هذا الاهتمام
النقدى إلا فى النصف الثانى من القرن الماضى وبعد تراكم

إبداعى عبر مئات السنين ، تزايد خاصة بعد عصر النهضة ،
وصاحب هذا التراكم تزايد ما يسميه النقاد الآن " بقلق " أو " هم"
التأثير والتأثر عند المبدع الجديد. وعبارة الكاتب المصرى
القديم تعنى أن الإبداع المصرى كان قد تراكم على مدى آلاف
السنين قبل الميلاد وبعد استقرار الحضارة المصرية . ويذكر
علم المكتبات مكتبة رمسيس العظيم وكيف أن أحد غرف هذه
المكتبة الضخمة احتوت وحدها على بضع وعشرين ألف كتاب،
ومن الحقائق المثيرة ذات الدلالة أن أرسطو اشتهر فى زمانه
كأكبر " وراق " أو " حافظ " للكتب ... والسؤال الآن هو : من
هم مؤلفى هذه الكتب التى اشتهر أرسطو بجمعها ؟ المؤكد أن
تلك الكتب كانت فى معظمها نتاج العقل المصرى وحصاد
حضارة وإمبراطورية مصرية شهدت قمما متعددة عبر أكثر من
خمسة آلاف سنة ق.م واعتلت عرش العالم لمدة أربعمئة عام
متواصلة انتهت بغزو الإغريق لمصر بعد عام ٣٣٢ قبل الميلاد
واستيلائهم على الأرض ونتاج العقل المصرى ونسيته إلى
أنفسهم ، من هنا بدأت جريمة التزييف وإخراج مصر
والمصريين من التاريخ .

الغريب أن كل القوى الاستعمارية التى جاءت بعد الإغريق إلى مصر سارت على نفس منهج " القوة تكتب التاريخ" مما أدى فى النهاية إلى خروج العقل المصرى من التاريخ ، ولم تعد مصر وحضارتها فى العقل الغربى سوى مميّات و ماضى خرافى ، بينما أخذ الغرب نفسه كل نتائج العقل المصرى وأعاد إنتاجه دون الاعتراف بالمصدر.

ويمكن القول إن أمريكا التى تقود الغرب والعالم الآن تواجه نفس الامتحان أو إغراء القوة التى تكتب التاريخ وهو إغراء لم تستطع مقاومته كل القوى قبلها ، لكن أمريكا - ورغم كل شئ - مازالت تستطيع أن تفعل ما لم تفعله أية قوة قبلها وتتغلب على هذا الإغراء ، ولقد نجحت فى ذلك داخليا من خلال الحلم الأمريكى الذى يشترك فيه ويعيشه ويكتبه كل الأمريكيين دون النظر لاختلاف فى دين أو عقيدة أو جنس أو لون أو ثقافة ، والمطلوب الآن "حلم العالم " الذى يرسم ملامحه ويعيشه ويكتبه كل شعوب العالم ، ولكى يكون هذا الحلم عادلا يجب أن يعترف بفضل وإنجازات العقل المصرى . هل نحن مستعدون لهذا الحلم ؟ وهل نقبل أمريكا أن يشاركها الآخرون هذا الحلم ؟

منذ الاف السنين ضيع المصريون والعالم " حلم العالم " الفريد هذا ، عندما جاء إخناتون وكانت مصر - مثل أمريكا الآن - تقود العالم ، لم يرد إخناتون بناء هرما لنفسه ، لكنه أراد أن يجعل من كل مصرى " هرما " ! أراد أن يحرر المصريين وبنى الإنسان من أنفسهم ، ومنطقه بسيط : لو أمن الناس بالله الواحد القادر وخافوه ، لما استبعد أو خاف بعضهم البعض . والرسالة سهلة ولا تحتاج إلى عناء فى فهمها ! ولكن العالم والمصريين - للأسف - ضيعوا " حلم العالم " الأول .

وإذا أراد المصريون العودة إلى التاريخ مساهمين ورواد فى حلم العالم المطلوب الآن ، فعليهم أن يستعيدوا ذاكرتهم كمعلمين وأساتذة ، فلن يساهم فى حضارة اليوم إلا أحرار فى دول ديموقراطية ، ولقد عانى المصريون كثيرا وحاربوا ونجحوا فى أن يستعيدوا أرضهم من عدو اختلفت صورته مع كل عصر ، ولكن أمامهم الآن تحد أخطر وأصعب وهو اكتشاف وهزيمة العدو " بينهم " ، لابد أن يحرروا أنفسهم من أنفسهم !!! وهذا هو شرط العودة إلى التاريخ .

وجدى زيد

هذه أغنيتي لبلدي وصلاتي لربي

الشخصيات

إخناتون	:	فرعون مصر
نفرتيتى	:	زوجة إخناتون
ميرى	:	ابنته
تاي	:	الملكة ، أم إخناتون
زيمات	:	أخت نفرتيتى ، زوجة حورمحب
حور محب	:	زوج زيمات ، قائد القوات العسكرية المصرية
ريبتا	:	كاهن آمون الأعظم
الكاهن الأول		
الكاهن الثانى		
الكاهن الثالث		
ماهو	:	رئيس البوليس
توتو	:	رئيس المخابرات
ميرورا	:	رجل من عامة الشعب
بيك	:	كبير الفنانين ، ورسام القصر
الساحرات تارا		

الرجل العجوز

الشاب

رسول من الشام

كاهن المعبد

الصبي

مجموعة من الفلاحين والنسوة والأطفال

مجموعة من الحراس والجنود

الفصل الأول

المشهد الأول

أحد شوارع مدينة تل العمارنة - "مدينة النور" ، تأتي أصوات الموسيقى من على بعد، رجال ونساء وأطفال يتطلعون في اتجاه الموسيقى وأصواء الاحتفالات خارج المسرح التي يبدو الأطفال مشدودين لها بشدة ، ويبدأ البعض منهم في التحرك تجاه أصواء الاحتفالات لكن الآباء يمنعونهم .

يبدو على وجود الآباء وحركاتهم القلق والخوف رغم مظاهر الاحتفال .

أسفل يسار ويمين المسرح ، الكاهنين الأول والثاني وثلاثة من الحراس متخفون جميعا فى عباءاتهم ، يراقبون الناس فى نفاذ صبر ، الكاهنان حليقا الرأس ويتنعلان أحذية من ورق البردى، وينظران إلى الناس فى غضب واضح بينما يقف الحراس الثلاثة فى تاهب !

يدخل صبيان يلعبان التحطيب والمصارعة وغيرها من الألعاب ثم يتحركان إلى أعلى المسرح فى اتجاه الاحتفال يتبعهم الأطفال محاولين الفكاك من أيدى آباءهم ، لكن آباءهم يرفضون ذلك ناظرين فى خوف إلى الحراس!

الأب : (ممسكا بيد ابنه فى قوة) لا ، قلت لا .

الطفل : (فى توسل ، محاولا التخلص من يد أبيه) عاوز أروح معاهم.

الأب : قلت لا . إنت ما بتفهمش؟!

الطفل : عشان خاطرى ، عاوز أشوف الفرعون الجديد

الأب : برضه لا .

الأم : (إلى الأب) سيب الواد يروح زى العيال ؟

الأب : (إلى امرأته ناظرا فى خوف وشك إلى الحراس
والكهنة) بس يا ولية ! إنت دارية بحاجة ؟!
الأم : خليه يشوف الحفلة .
الأب : لا حفلة ولا يحزنون ، خلىنا بعيد .
(لنفسه ناظرا حواليه) شكلها طين من
أولها !
الطفل : (صارخا فى تنمر) سيبنى ... سيبنى!
الأب : (غاضبا) إخرس...
الرجل العجوز : (متدخلا) مش كده ، ما تعملش كده مع ابنك .
الأب : (إلى الرجل العجوز) خليك ف حالك لوسمحت .
الرجل العجوز : الأطفال أطفال يا بنى ويجب ...
الأب : (مقاطعا فى دهشة) يا سيدى ده ابنى وما طلبتش
من حد يعلمنى أعامله إزاي !
الرجل العجوز : (مبتسما فى هدوء) أنا ما قلّتش إنك مش
عارف تعامله يا بنى .
(يقترّب من الطفل غير واع بوجود الكهنة أو
الحراس)
(فى رقة وهو ينحنى له)

عاوز تشوف الفرعون الجديد؟
هتشوفه ، أنا كمان عاوز أشوف إخناتون ، لكن
لايد ننتظر ثلاث نيام ... تعرف تعد ثلاثة ؟ ...
(يمسك بأصابع الطفل يعد عليها) بكرة أول
يوم... واحد ...

الطفل : (فى سعادة) اتنين ... ثلاثة ...
العجوز : اليوم الثالث هو يوم الاحتفال الكبير وفيه يلبس
مولانا إخناتون التاج.
(الكاهن الأول يتبادل النظرات مع الحارس
الأول الذى يتحرك ناحية العجوز ويقف
خلفه دون أن يعي العجوز ذلك).
العجوز : فى اليوم الثالث فيه حلويات وحاجات حلوة
كثيرة، ف اليوم ده هتشوف أنت وأصحابك
إخناتون ... هتشوفه فرعون جديد غير كل
اللى سبقوه ، هتشوف...

الحارس الأول : (فى عنف إلى العجوز) إنت بتتكلم كثير !
العجوز : (مندھشا وخائفا) أنا بس ...
الحارس الأول : كفاية . مش عاوز أسمع . روح بيتك !

(يدفعه بعنف) روح!

(يخرج العجوز ، ويعود الحارس إلى حيث كان

ناظرا إلى الآخرين في تهديد).

الأب : (إلى امرأته وطفله) جالكم كلامي ؟ أنا

عارف...

الحارس الأول : (إلى الأب في حدة) يقول إيه ؟

الأب : (ناظرا إلى السماء) مفيش ... أنا بس كنت

يقول إن شكلها كده هتمطر.

(إلى امرأته وطفله) يالله يا ولية ، يالله يا واد ،

ده حتى القعدة في البيت حلوة !

(يخرج الثلاثة)

(صمت)

(مازال الحارس ينظر إلى الجمهور الذي تزايد

فيه الخوف والقلق)

رجل : (ناظرا إلى السماء محاولا إخفاء خوفه) فعلا

هتطر جامد ... هترخ ، وكمان البرد هيلسوع!

(وقفة)

(إلى الآخرين كمن يحاول إقناعهم) البيت بأه دفا

.. ومريح ... مريح جدا مش كده ؟ !

(يتبادل الناس النظرات قبل أن يخرجوا ، كل

فى اتجاه بيته)

الكاهن الثانى : (إلى الكاهن الأول) نفايات ، جنباء !

الكاهن الأول : منافقين جهلة !

(صمت)

(يدخل مجموعة من العامة يقودهم شاب يحمل

صور الفرعون الجديد ، لكن الحارس الثانى

يقف فى طريقهم)

الحارس الثانى : على فين ؟

(إلى الشاب) رايح على فين إنت وهو ؟

الشاب : فيه إيه ؟

الحارس الثانى : (وهو يضربه بالعصا على كتفه) أنا اللي

بسأل ، مش أنت . (يضربه مرة أخرى) واخد

التبالة دول ورايح على فين ؟

الشاب : (يحاول أن يرد الضربة ، لكن الحارس الأول

يعاجله بضربة من الخلف) بتضربنى ليه ؟ فيه

إيه بتعاملونا كده ليه ؟ هو إحنا عبيد؟

الحارس الأول : (بضربه ثانية) بطل كلام فارغ !

الحارس الثانى : (منتزعا الصور من الشاب) إيه ده ؟

(ينظر إلى الصور ويعطيها إلى الكاهن الأول

الذى ينظر إليها هو الآخر قبل أن يناولها إلى

الكاهن الثانى)

الشاب : (فى ثبات رغم ارتياكه) صور مولانا الفرعون

الجديد. واحنا رايعين الاحتفالات قدام المعبد .

فيه مشكلة ؟

(يتبادل الحراس والكهنة نظرات سريعة ذات معنى)

الكاهن الثانى : (يخطو ناحية الشاب - ف هدوء) يبدو أنك

ابن ناس ! مين والدك ؟

الشاب : ناخت خامو.

الكاهن الثانى : (يكتب الاسم محاولا أن يتذكر) ناخت خامو ..

من دوقما ؟

الشاب : أيوة .

الكاهن الثاني : إنتم عيلة كبيرة . (وقفه) (مفكرا) دقما في
وسط الدلتا ، بعيدة عن هنا،إيه اللى يخليك
تيجى من هناك لهننا وتسافر المسافة دى كلها
عشان تشترك فى أمور مشبوهة ؟
الشاب : أمور مشبوهة ! أنا هنا مع أصحابى جايين
نحضر حفل تتويج الفرعون الجديد إخناتون ،
والصور دى صوره !
الكاهن الثاني : (مقاطعا فى حدة) لا . دى مش صور
الفرعون . الفرعون ما يلبسش دى الناس
العاديين !

(وقفه)

مين إداك الصور دى ؟
الشاب : معرفش .
الكاهن الثاني : (إلى الحارس) خده !
(الحارس يفتاد الشاب من ياقته فى عنف)
الشاب : (صارخا وهو يخنق) ما تعملش كده معايا ،
إعرف إنت بتعامل مين ! أنا معلم أربى أجيال !

الكاهن الثانى : (كأنه لم يسمع كلمات الشاب - يتحول

إلى الآخرين مهددا) وأنتم ؟

(الجميع لا ينطقون خوفا)

(وقفه)

(صارخا فى لهجة أمرة)

بلله ... بلله إنت وهو ! على بيوتكم ، ..بلله !

(يختفى الجميع) (وقفه)

(إلى الحارس الثانى) خد الشارع ده لغاية

المعبد.

(إلى الحارس الثالث) وأنت الشارع التانى .

مش عاوز حد من المنافقين دول فى الشوارع،

صور الكافر شيلوها ، ما تخالوش حد

يمشى بيها فى الشوارع .

(يخرج الحارسان)

(يختفى صوت الموسيقى) (صمت)

(يسود الظلام المسرح كله باستثناء بقعة شاحبة

تسمح برؤية الكاهنين).

الكاهن الثانى : (يتجه إلى أعلى المسرح مفكرا ، ويعود -

إلى الكاهن الأول) عليك تراقب الحراس

وتنفذهم للأوامر ، لا تتق ف أحد !

الكاهن الأول : وأنت ؟

الكاهن الثاني : سيدنا الكاهن الأعظم يصل إلى هنا قبل نص

الليل، معاً رسالة منه إلى الرجل بتاعنا ف

القصر . زى ما قلت لك ، خد بالك ولا تتق في

أحد ، ما تتساش هنتقابل كلنا ورا المعبد بعد

نص الليل !

إظلام

المشهد الثاني

منتصف الليل ، خلف المعبد ، رعد وبرق .
(يدخل الكاهن الثاني وفي يده الصور ، يتبعه
الكاهن الأول . مازال الكاهنان يتخفیان فى
عباءتيهما)
الكاهن الثاني : (ناظرا حواليه) المكان آمن !

الكاهن الأول : أيوه.

الكاهن الثاني : (ناظرا إلى السماء) النجم الجنوبي ظهر.

فيضان السنة دى هيغروق الدنيا!

الكاهن الأول : الظاهر كده !

الكاهن الثاني : بدأت المية تغطى الشط ، حظنا حلو ، كل

رجالتنا وصلوا هنا قبل ما تسوء الحالة.

(يخلع عبايته) (وقفه)

الكاهن الأول : (يخلع عبايته) سيدنا الكاهن الأعظم يعرف

يوصل هنا؟

الكاهن الثاني : هيبجى مع النائب سوكا. وسوكا يعرف.

(يتوقف مصغيا السمع)

هس...فيه حد جاى ...

(يدخل الكاهن الأعظم ويتبعه سوكا الكاهن

الثالث، يتخفى كل منهما فى عبايته)

الكاهن الثاني : (وهو يجرى ملاقيا الكاهن الأعظم) سيدى ...

سيدنا المعظم (يركع ، ويقبل يديه) شكرا

للآلهة على وصولكم سالما وبخير.

الكاهن الأول : (راكعا يقبل يديه) سيدنا المعظم !

الكاهن الأعظم : لقد كان طريقا طويلا شاقا .

(يخلع عباةته ويتبعه فى ذلك ، دون تفكير ،

نائبه سوكا)

(يبدو الكاهن الأعظم مرهقا ومجهدا ومهموما ،

تخطى الخمسين حليق الرأس ، يرتدى تنورة

طويلة فضفاضة ، ووشاحا أسودا يلتف حول

كتفيه وصدره ، ورغم سنه المتقدم ، تبدو عليه

ملامح القوة والنشاط ، وتوحى سمات بنيانه

القوى بالثقة والقدرة والدهاء الدفين)

الكاهن الثانى : كيف حال طيبة يا سيدى ؟

الكاهن الأعظم : لقد حطموا معبدا اخر من معابدنا عندما جاء

الكافر لحضور جنازة أبيه الملك.

الكاهن الثالث : (فى مرارة) لم يستطع أن يصبر سبعين يوما

نحضر فيها جسد والده لرحلة الخلود !

الكاهن الثانى : (فى غضب) والناس يا سيدى ؟!

الكاهن الأعظم : الناس منقسمة على نفسها بين ولائها للالهة

وللعائلة المالكة.

(وقفه)

لكننا سننتصر بفضل الهتنا. أين توتو ؟

الكاهن الثاني : قال إنه سيأتي متأخرا بضع دقائق .

الكاهن الثالث : (فى احتراس) سيدى ... يجب أن نعتد على

أنفسنا فقط ، أقصد هل تثق فى توتو يا سيدى ؟

الكاهن الأعظم : نعم أثق فيه ، لابد أن تثق فى هؤلاء الذين

يفعلون كل شئ، وأى شئ من أجل طموحهم ،

جاعنى توتو منذ سنوات يبلغنى عن أخيه ويشى

به ، لهذا زرعت فى القصر الملكى.

الكاهن الأول : (مندهشا) خان أخوه ابن أمه وأبوه ؟!

الكاهن الثالث : إذن يخون أى إنسان !

الكاهن الأعظم : فقط إذا لم تعطه ما يريد ، ولقد أعطينا الكثير

وما زال لدينا الكثير الذى يطمع فيه ، أثق فيه

لأننى أعرف ثمنه !

(يدخل توتو ، له وجه ممثلى وعينان جاحظتان،

تشى بطموح قاس)

(إلى توتو) هذا هو صديقنا العظيم ! مرحبا بك

يا توتو.

توتو : (يركع ويقبل يديه) سيدنا الكاهن الأعظم.

الكاهن الأعظم : (متفرسا وجهه) هل عندك أخبار يا توتو ؟

توتو : أخبار سيئة يا سيدى .

الكاهن الأعظم : وهى ؟

توتو : لقد اعتمد الأمير قرارات يعلنها بنفسه يوم

التتويج !

الكاهن الأعظم : أية قرارات ؟

توتو : بعد يوم التتويج مباشرة ، لن تكون هناك

عبادة فى المعابد لأمون والآلهة الأخرى

ولن يكون لكهنوتهم مناصب ، ويتم التخلص

من كل صور ورموز هذه العبادات من كل

المعابد !

(تأخذ الصدمة بالجميع)

الكاهن الأعظم : (فى هدوء رغم التوتر) قلت إنه اعتمد

هذه القرارات ؟

توتو : نعم اعتمدها وسيعلن أن إله جديدا قد أوحى إليه

أنه الإله الواحد الحقيقى ، وأن كل الآلهة

الأخرى زائفة !

الكاهن الأول : ألهتنا زائفة !

(صمت)

الكاهن الثالث : لا بد أن نفعل شيئاً يا سيدى وقبل أن يتوج ،

سيهدم معابدنا بعد تنويجه ثم يتخلص منا

نحن كهنة آمون والآلهة الأخرى!

الكاهن الثانى : وسياخذ أراضينا !

الكاهن الأول : ونسوانا وبيوتنا !

الكاهن الثالث : (يخطو ناحية الكاهن الأعظم) ماذا ننتظر

يا سيدى؟ إذلال أكثر؟

(وقفة)

الكاهن الأعظم : (متحاشيا نظراتهم الملحة ، يزرع المكان

جينة وذهابا ، ثم يلتفت إليهم - فى هدوء)

تجزعوا يا أصدقاء.

(متجها ناحية الكاهن الثالث) تعجبني شجاعتك

يا سوكا، ولكن إذا كنت ستقود كهنة مصر يوما

ما ، فعليك أن تكون صاحب رؤية واضحة

تماما تساعدك على اكتشاف حكمة الآلهة .

الكاهن الثالث : لكن يجب ألا نضيع الوقت يا سيدى .

الكاهن الأعظم : (فى حدة) لا . نحن لا نضيع الوقت .

(وقفه)

لقد توقعت كل ذلك . الأمير شاب أحمق ،
وتوقعت أنه سيدفع الأمور هكذا ، لكن ذلك
سيكون في صالحنا

الكاهن الثالث : كيف ؟

الكاهن الأعظم : إن آلهتنا مستقرة في قلوب وعقول الناس منذ
آلاف السنين ، وهذا الحالم المتسرع لا يستطيع
أن يغير ذلك .

(ينظر حوله ويلمح سلما خشبيا عند الحائط

فيتجه نحوه)

مصر في أيدينا . (يمسك بالسلم مشيرا

إليه) نحن على القمة وفي كل مكان هنا ، أما
الأمير فلم يكن متواجدا في كل مكان مثلنا
(مشيرا إلى رأس السلم) مكث والده هنا سبعة
وثلاثين عاما ، ولم يثق به أبدا لأنه
يعرفه ، وحتى عندما مرض في العامين
الأخيرين من حكمه أجبر هذا المارق على

الخروج من طيبة بدلا من أن يسمح له
بالاستمرار والمشاركة في الحكم.

(يبتعد عن الحائط) وجاء المارق هنا إلى
الصحراء ليبنى مدينته ، لكننا لن نسمح له أن
ينهى ما بدأه . أعدكم أيها الأصدقاء ما بناه
سيصير خرابا عاجلا .

(وقفه)

(إلى توتو) توتو

توتو : سأكون أول من يضرب ...

الكاهن الأعظم : (مقاطعا) لا . لم نصل إلى هذا بعد.

(وقفه)

كنا مستعدين لمواجهة في طيبة ، لكن الأحمق
جعل مهمتنا أسهل ، سنهزمه هنا.

(وقفه)

لدينا الكثير نفعله قبل التتويج . (إلى توتو) كل
همسة في القصر يجب أن تحيطنا بها ، ولا
تغفل عن حورمحب وغريمك ميرورا !

توتو : سأفعل ذلك يا سيدي .

الكاهن الأعظم : (إلى الكهنة) هناك الكثير من العمل السرى

فى الشوارع بين الناس !

الكاهن الثانى : (يعطيه الصور) وجدنا هذه الصور مع شاب

منذ ساعات قليلة.

توتو : (ناظرا مع الكاهن الأعظم إلى الصور)

نفس الملابس المضحكة التى يرتديها، إنه

يذهب إلى القصر على الشط الآخر للنيل

متخفيا فى هذه الملابس!

الكاهن الأعظم : لماذا ؟!

توتو : لا أعرف .

(وقفه)

الكاهن الأعظم : (مفكرا - فى اهتمام واضح) هل يتعرف

عليه الناس ؟

توتو : لا .

الكاهن الأعظم : (فى رضا) هذا حسن !

(وقفه)

(إلى الكاهن الثانى) ماذا فعلت مع الشاب ؟

الكاهن الثانى : أخذناه إلى أحد كهوفنا فى الجبل .

الكاهن الأعظم : لا تطلق سراحه حتى ننتهى ، هل وصل كل رجالنا من طيبة ؟

الكاهن الثانى : نعم سيدى ، ومستعدون فى الجبل .
الكاهن الأعظم : حسنا ، لالهتنا الكلمة الأخيرة .

(وقفة)

(متجها إلى منتصف المسرح)

هذه لحظة خطيرة فى تاريخ مصر ، إننا لم نسع إلى هذا الصراع .

(يتحركون ويلتقون حوله تحت بقعة ضوء واحدة)

لم نصل إلى النهاية بعد .

(وقفة)

علينا أولاً أن نهزمه هنا فى شوارع هذه المدينة وبين الناس !

الكاهن الثانى : الناس لا يمكنها فعل شئ !

الكاهن الأول : الناس لا حول لهم ولا قوة !

الكاهن الثالث : الناس ليس لها علاقة بما يحدث !

الكاهن الأعظم : غير صحيح : الناس ليس لها حول ولا قوة ،

ولا يمكنهم فعل شئ ، لكننا يجب ان نبقىهم
بعيدين عما يحدث !
هذا هو العامل الحاسم : أن نجعلهم لا يفعلوا
شيئاً!

الكاهن الثانى : كيف ؟

الكاهن الأعظم : كما فعلنا معهم فى طيبة وكل مكان فى
مصر . أريد شائعات هنا ، فى كل مكان بالمدينة .
فى الأيام القادمة الثلاثة ، ازرعوا شائعات تمتد
جذورها وتحضر ثم تأتى ثمارها سريعا وقبل
الحصاد عندما نواجهه فى يوم التتويج !

(وقفه)

أريد الناس عاجزين عن فعل أى شئ بعدها
يمكننا فعل كل شئ . واى شئ !
سنجعله يدفع ثمن كل ما فعله معنا !

إظلام

المشهد الثالث

فناء معبد بقرية على الجانب الآخر من النيل
المواجه لتل العمارنة ، الفلاحون ملتفون حول
صبي يرتعد خوفا ويحمل كيسا من الحبوب ،
بينما الكاهن يجوب المكان جيئة وذهابا ، رامقا
الصبي في نظرات غاضبة بين الحين والآخر .
بين الفلاحين يقف إخناتون وإثان من الحراس
يراقبون ما يحدث يتخفى إخناتون والحارسان في
ملابس عادية لا تتم عن كنيتهما.

الكاهن :
(يتجه إلى أعلى المسرح ثم يواجه الجمهور -
فى لهجة مسرحية) يا إخواننا كيس حبوب
ليس بمشكلة، لكنها مجرد بداية!
(صارخا) إنها البداية والألهة وحدها تعرف ما
الذى يمكن أن يحدث بعد ذلك !
(يتجه ناحية الصبي ويقف أمامه مباشرة ناظرا
فى عينيه بحدة ، بعدها يعود مخاطبا
الفلاحين والجمهور)
هل ننتظر يا جماعة الخير ؟
هل ننتظر حتى نرى هذا الصبي يسرق شيئا
أكبر ؟
هل ننتظر حتى نراه يسرق ويعلم غيره السرقة ؟
هل ننتظر يا جماعة الخير !?
(صمت)
كلا وحق الهتنا ! كلا ثم كلا ثم كلا !
أكاد أسمعكم جميعا وأنتم تقولون متلى كلا !
(صمت)
لكننى أريد أن تعرفوا أن الشيطان داخله هو

لذى دفعه لأن يسرق نعم انه الشيطان داخله!

ولهذا (الى أحد اتباعه فى نظرة ذات معنى)

ولهذا سوف نعاقب الشيطان داخله !

(يتجه التابع ومعه سوط نحو الصبى ، فيخلع

عنه قميصه ويقوده إلى وسط المسرح للجلد)

: (يخطو إلى الأمام مواجهها الكاهن) إنت سألت

سرق ليه ؟

: (يتحول إلى إختاتون - فى عنف) عفوا ،

لم أسمعك !؟

:إنت سألت الولد ليه عمل اللى عمله ؟

(صمت، الجميع يتابع ما يحدث فى خوف

وترقب)

: (فى تحدٍ وعنّف إلى إختاتون) من أنت ؟ لم

أرك هنا من قبل!

: (فى هدوء) أنا بسألك إنت سألت الولد ليه

سرق شوية القمح دول؟

: وأنا أسألك من أنت ؟

: إختاتون.

إختاتون

الولد

الكاهن

إختاتون

الكاهن

إختاتون

الكاهن

إختاتون

الكاهن : (مرتبكا) من ؟!
إخناتون : أنا إخناتون ملك مصر !
(تبدو على وجوه الكاهن والقرويين الصدمة)
(يتحرك إخناتون إلى الصبي ، وإلى الكاهن وهو يفك وثاقه) ما سألتوش ليه سرق ؟
الصبي : (ياكيا) معذناش حاجة ناكلها !
إخناتون : (فى حنان) فين أبوك ؟
الصبي : مات !
(وقفه)

إخناتون : (إلى الكاهن) تقول إنت إيه دلوقتى ؟ تقول إيه ولا تعمل إيه إنت والأصنام الخارسة العامية اللى بتعبيدها ؟

(إلى الحارسين) ادخلوا جوه المعبد وحطموها كل الأصنام ! خلونا نشوف الالهة بتاعتهم هتعمل إيه! (يختفى الحارسان فى سرعة داخل المعبد)

(تسمع أصوات تحطيم الأصنام بالداخل ، بينما
يقف الكاهن مصدوما عاجزا ، والناس بعضهم
فى رعب لا ينطقون وآخرون يتسللون فى
خوف إلى بيوتهم)

إِظْلَام

المشهد الرابع

حجرة في قصر إخناتون ، الوقت صباحا ،
كبير المهندسين والنحاتين بيك يتأمل في إعجاب
بعض الصور على ورق البردى ويبدو غير
واع بوجود توتو... تأتي أصوات الموسيقى من
على البعد...

بيك : (إلى نفسه بصوت عال بينما ينظر إلى إحدى الصور) الجميل والصادق، الصادق والجميل، العلاقة بين الاثنين عميقة ومثيرة!
(يتجه ناحية توتو ويقف أمامه مباشرة ويبدو كأنه مازال لا يعي بوجوده) الصادق والجميل !
توتو : (يحاول أن يكون رقيقاً) هل تكلمنى يا ببيك ؟
بيك : (بصوت عال، لنفسه مازال) الصدق والجمال
كل صادق جميل ! معلمى ومليكى إخناتون...
توتو : (مقاطعاً) إنه فى حديقة القصر.
بيك : (غير مبالي بما قاله توتو) مليكى ومعلمى
إخناتون يقول إن كل ما هو صادق جميل !
(ناظراً مرة أخرى إلى الصورة) وهذه الصورة صادقة فعلاً ، عشان كده لابد تكون جميلة،
وهى فعلاً جميلة !
(إلى توتو) إيه رأيك يا توتو فى الصورة دى ؟
توتو : (فى فتور) ظريفة !

بيك : مش ده الموضوع ، الصورة دى جميلة لأنها
صادقة، دى صورة مليكنا إخناتون زى ما هو
فى الحقيقة ، وده جديد فى الفن ، مفيش ذواقه
ولا تجميل ، مفيش غير الحقيقة ، زى ما هو
فى الواقع ، عشان كده الصورة جميلة !

(وقفه)

إذى تحب صورتك يا توتو ؟ عاوزها دى ما
انت فى الحقيقة ، والا دى ما تحب الناس
تشوفك ؟!

(وقفه)

الصدق جميل ! ... كل صادق جميل.
(مفكرا) لكن السؤال دلوقت ... هل كل جميل
صادق؟
(يدخل حورمحب ، تتم ملامح جسده القوى
ووسامته
الظاهرة عن شخصية جديرة بالثقة ، لكنه يبدو
مهموما وغير سعيد)

أهلاً برجل السيف، قائد الجيوش المصرية،
نحن نتكلم يا سيدى عن العلاقة بين الجمال
والصدق، والسؤال ...

حورمحب : (مقاطعا فى ضيق) إحنا ف إيه وانت ف إيه
يا بيبك !

(إلى توتو) أين الملك يا توتو ؟

توتو : يتناول إفطاره مع العائلة فى حديقة القصر
الخلفية.

حورمحب: أريد التحدث إليه ، الموضوع عاجل !

(أصوات تأتى من خارج المسرح ، يدخل

إخناتون ونفرتيتى وابنتهما الصغرى ميرى)

(يبدو إخناتون نحىلاً وضعيفاً ، وملابسه بسيطة

عادية مثل التى رأيناها بها فى الصورة . يدعو

ظاهره إلى الشفقة والإعجاب معا، وتتم قسما

وجهه ونظرات عينيه القلقة عن حزن عميق

وهموم من يبحث عن الحقيقة ، رغم هذا له

حضور أسر يدركه المرء مع الوقت)

(ترتدى نورتيتى فستانا ابيض فضفاضاً يظهر
جمالها وأناقتها ، غير أن وجهها وحركتها
تكشف عن حياة جافة غير مكتملة وغير متحققة
بشكل جوهري)

ميرى : (تجربى وراء أبيها فى سعادة - فى توسل) مرة
كمان ، مرة كمان !

إخنا تون : (مبتسماً) مش وقته !

ميرى : عشان خاطرى ، مرة كمان.

إخنا تون : مرة واحدة ! (يحملها فوق كتفيه لعدة ثوان
ثم يعيدها إلى الأرض وهى تصرخ فى سعادة
غامرة)

(إلى الآخرين بعد مغادرة ميرى) صباح الخير .

(يلحظ توتو وهو يبالغ فى انحنائه لتحيته،

على عكس بيك وحورمحب اللذان كانت

انحناءتهما خفيفة غير مبالغ فيها - إلى توتو)

أنا قلت إحنا بنسجد لله الواحد بس !

توتو : (ناهضاً فى خجل) عفوا أيها الملك ، نسيت !

وأعتذر وأرجو أن تسامحنى...

إخنائون: (مقاطعا ، إلى حور محب مبتسما) صاحى

بدرى النهاردة !

(متفرسا وجهه) فيه حاجة شاغلاك ؟

(وقفة)

فيه أخبار ليك عن أزورو !

حورمحب : أنا هنا لنفس السبب يا مولاي .

إخنائون : (إلى بيك) طيب نشوف اللى عند بيك الأول.

بيك : كل شئ تقريبا جاهز لحفل التتويج يا مولاي.

إخنائون : تقريبا ؟!

بيك : مدخل المدينة يا مولاي يحتاج بعض الوقت .

إخنائون : ليه ؟

بيك : لم يصل بعد الجرانيت الأحمر من أعالي النيل.

إخنائون : جرانيت أحمر ! ليه التبذير ؟!

بيك : تبذير ! المناسبة عظيمة يا مولاي !

إخنائون : ولو ، مطلوب البساطة والاعتدال ، اشتغل

بالموجود ، إيه تانى؟

بيك : (يريه الصورة) أنتجنا كم كبير من صورتك يا

مولاي.

اخناتون : (ينظر إلى الصورة) معقولة ، كده الناس تبقى
مستعدة !

(وقفه - إلى نفرثيتي) رايتك إيه ف الصورة يا
مليكتنا العزيزة "معقولة" ؟

نفرثيتي : (في قليل من الحماس) طبعاً يا مولاي.

بيك : هناك صور أخرى لمولاي ومولاتي ، وصور
لمولاي والعائلة، وصور لمولاي و...

اخناتون : (مقاطعاً يربت على كتفه مبتسماً) كفاية صور
عني وعن عيلتي، عاوزك إنت وكل
الفنانين تروحوا للناس على النيل وفي
الغيطان.

وصوروا كل شئ على حقيقته وطبيعته !

بيك : سنفعل يا مولاي .

(ينحنى ويخرج)

نفرثيتي : (في محاولة لكسر حالة التوتر - إلى حور

محب) كيف حال أختي زيمات ؟ شفتها مرة
واحدة من يوم ما جيتو من طيبة !

حورمحب : بخير يا سيدتي.

(وقفه)

إخناثون : (إلى حور محب) وصل رسول من تونيب.

(إلى تونو) اسمحوا له بالدخول.

تونو : (ينحنى ، خارجا) أمر مولاي.

(وقفه)

حورمحب : (يخطو ناحية إخناثون - بعناية) يجب أن لا

نتق في أزورو يا مولاي!

إخناثون : (مشجعا) يعنى...

حورمحب : يجب أن نرسل في الحال قواتنا إلى سوريا!

(يدخل الرسول ويبدو عليه التعب والإرهاق

ملابسه متربة وفي حالة يرثى لها من وعشاء

السفر)

إخناثون : نسمع صديقنا من تونيب.

الرسول : (ينحنى في احترام شديد) مولاي فرعون مصر

العظيم ، (يفتح الخطاب) هذا خطاب من حاكم

تونيب إلى مولانا ملك مصر العظيم (يقرا)

نحن أهل تونيب، خدام مولاي ساجدين عند

أقدامكم، ندعو لكم بالصحة والخير، مولاي

لقد سقطت مدينة ناي ، والآن مدينتكم تونيب
تُزرف دموعها ولا يقدم لها أحد يد المساعدة،
ولقد أرسلنا الاستغااث طوال العشرين
الماضية إلى مولانا ملك مصر ، لكننا لم نتلق
إجابة !

(منحنيا يعطى إختاتون الخطاب ثم يخطو إلى
الخلف)

إختاتون : (ممسكا بالخطاب - إلى توتو الذى يجرى
لأخذه) خليه يرتاح ، الإجابة النهاردة.
(يخرج توتو والرسول) (وقفه)
(إلى حور محب) إيه رأيك ؟

حور محب: جئْتُ هنا وأنا لا أعلم شيئاً عن هذا الرسول،
لأننى قلق بخصوص ما يجرى فى سوريا
منذ سنين ، وهذه الرسالة تعنى مولاي ان
اقتراحي بإرسال القوات إلى سوريا فى الحال
هو اقتراح سليم.
(توتو يدخل ثانية)

إخناثون: (إلى توتو) الملكة الأم هتوصل دلوقتي ، انت

وماهو تكونوا في استقبالها.

نفرتيي : أنا كمان هكون في استقبالها .

(تخرج)

إخناثون : (يقف ، مفكرا) المشكلة عمرها عشرين سنة !

حورمحب : إذن يجب أن لا نضيع وقتا أكثر في الانتظار !

إخناثون : كتبنا لأزوروا؟

حورمحب : أنا لا أثق فيه، ولا يجب أن نضيع الوقت

في الكتابة إليه وانتظار الإجابة، إنه وضع

ويزرع الوقيعة بين البلاد بعضها البعض ، كي

يزيد في أرض بلده على حساب الجميع ،

يتظاهر بأنه صادق معكم ومع الحثييين ، وهو

في الحقيقة محتال كذوب مع كليكما ، بل إن

كذبه وخسته موجهة أساسا (يتردد) إليكم !

إخناثون : (يبتعد عنه ويتجه إلى منتصف المسرح، ثم يقف

مفكرا) عاوزني أبعث قوات دلوقتي ؟

حورمحب : نعم يا مولاي، لقد دمر مدينة ناي، وسندمره ،

العين بالعين والسن بالسن !

إخناثون : العنف يخلق عنف... طريق العنف مالوش

نهاية يا حور محب.

(صمت)

حور محب : مولاي ، أزورو مخادع وكل ما يريد هو الوقت
وأنتم (يتوقف) أقصد أننا نعطيهِ الوقت يا
مولاي فيضم إلى أرضه القبائل الأضعف في
سوريا بعد قتالها وهزيمتها ، بعدها يتحول إلينا
وتلك هي بداية انهيار (يتردد)
ال...الإمبراطورية المصرية.

إخناثون : (في هدوء وحسم) الانهيار بدأ هنا يا عزيزي

حور محب !

عاورني أبعت قوات بره والبيت من جوه فاسد،
أنا باتكلم عن الأولويات ، ويبدو إنك مش
شايف العلاقة بين اللي حاصل على حدودنا
والقلب الفاسد، الانهيار اللي بتتكلم عنه بدأ من
جوه ! (وقفه) الناس في طيبة وفي كل مكان
بمصر مش سعيدة ولا مرتاحة لأن الظلم
والجشع والاستغلال في كل مكان ، الكهنة

وأصنامهم ورا كل ده ! أنا معركتى هنا يا حور
محـب ، وعاوز أبتدى صح ، الحمد لله الذى لا
إله إلا هو ، الذى هـدانى إلى الطريق المستقيم .
(يتجه ناحية منتصف المسرح ، ثم يعود إليه -
فى ود صادق) البداية نصلح القلب.. قلب
البلد ، وفى نفس الوقت نكتب لأزورو نطلب
منه بينى اللي هدمه .

حور محـب: (مصدوما) لن يستجيب يا مولاي !

إخـناتون : إدى له فرصة.

حور محـب: سيظن أننا نخافه .

إخـناتون : لا إحنا مش خايفين ، نعطيه فرصة ونعطى

أنفسنا فرصة نغير فيها كل شئ ! (وقفة)

الناس لابد تتعلم وتعيش فى حب وسلام مع
بعضيتها ، وده ممكن يكون غريب بالنسبة لهم
بعد سنين طويلة من الاضطهاد والحروب
وسفك الدماء ، لكن مصر النهاردة بتقود
العالم ولابد تكون القدوة ، وفى النهاية هيعم
الحب والسلام يا صديقى !

حور محب: حب وسلام! لن ير العالم الحب والسلام ولو بعد
مائة عام من الآن! (وقفه) أخشى يا مولاي أن
هذه المثاليات لن تمكننا من السيطرة على
الإمبراطورية ونفشل ف...

إخنا تون: (مقاطعا) لا. لا. لا. لن نفشل، ربي هو الرحمن،
هو السلام والحب، يغمر حبه الكون والحياة كلها
إنسانها وحيوانها، وحتى زهورها الضعيفة.
(في لهجة حاسمة) نبدأ بعد التتويج مباشرة،
وعاوزك تكون مستعد.
(رغم صمت حور محب، تتم ملامحه عن عدم
الرضا والرفض)

حور محب: (ينحنى، مغادرا) مولاي!
إخنا تون: (قبل أن يختفى حور محب) حور محب!
(يستدير إليه حور محب) طبعاً مش ممكن
أجبرك تؤمن بالله الواحد الذي لا إله إلا هو،
لكن أنا أعرف حيك لمصر وإن ها يجي يوم
لا بد تختار! إظلام

المشهد الخامس

غرفة فى قصر إخناتون يدخل توتو وماهو ،
رئيس الحرس . تأتي أصوات الموسيقى
والترانيل من جناح داخل القصر .

ماهو : بالعافية وصلنا للشاطئ، والملكة الأم وصلت
 بخير ، حفظنا حلو، بس الفيضان هيغرق الدنيا !
 توتو : يا ريت !
 ماهو : (مندهشاً) ليه ؟!
 توتو : دواعى الأمن !
 ماهو : مش فاهم !
 توتو : أهو ده أحسن حاجة بحبها فيك ، الصديق ،
 ناس كتيرة ما بتفهمش بس بيدعوا إنهم بيقيموا،
 إنت ما بتفهمش لكن ما بتدعش إنك بتفهم.
 بتقول الحقيقة، إنك ما بتفهمش! يا سلام على
 الصديق والأمانة!
 ماهو : (فى رضا وخجل) شكرا ، شكرا .
 توتو : (يقترّب منه - كأنه يفشى سرا) أقول لك يعنى
 إيه دواعى أمن،لما النيل يبقى هايج والفيضان
 يغرق الدنيا ، الناس فى القرى على الشط
 التانى مش هتقدر تحضر حفل التتويج ،
 ودى معناها ناس أقل يحضروا ، طبعاً أنا أحب

كل المصريين يشوفوا تتويج اميرهم ، لكن أنا
باتكلم هنا كرجل أمن، إحنا نقدر نستحكم فى
الموقف تماما لو كان عدد اللي هيحضر أقل
على قد ما نقدر ، إنت عارف البلد بتغلى!

ماهو : فهمت ، كلامك كله صح يا سيدى !

(وقفه) (تعلو أصوات الموسيقى والتراتيل)

توتو : (منطلقا إلى حيث تأتى التراتيل) حلوة ! جميلة!
بتحبها ؟!

ماهو : أيوه.

توتو : أقصد إنت بتؤمن بالله الواحد الذى لا إله إلا هو ؟

ماهو : (مرتكا) بصراحة يا سيدى ، أنا شافها صعبة

عليه إنى أومن بالله مش قادر أشوفه ، لكن أنا
بحب مصر وبحب الأمير...

توتو : (مقاطعا بسرعة) طبعا طبعا ، كلنا بنحب مصر ،
كلنا بنحب الأمير.

(وقفه)

(مبتسما) أنا شفت الملكة بتقول لك حاجة

وهى نازلة من المركب؟

ماهو : كانت بتسألنى على الأمير .

توتو : باين عليها قلقانه !

ماهو : قوى !

(وقفه)

توتو : عشان كده عاوزك تسمعنى وتركز معايا يا

ماهو ، إنت عارف أعداء مصر والأمير ممكن

يستغلوا الفترة الانتقالية دى ، لابد نصصح

قوى لآى أخطار جاية !

ماهو : طبعاً يا سيدى ،

(وقفه)

إمبارح بالليل ، رجاله مثلتمين رعبوا الناس !

توتو : أنا عارف ، سيبك منها دى حاجة مش مهمة ،

نزاعات شخصية!

روح لشغلك دلوقتى وبلغنى بكل همسة فى

القصر .

ماهو : بس لايد أروح لميرورا دلوقت !

توتو : عشان إيه ؟!

ماهو : مولانا عاوز يشوفه !

توتو : (يحاول أن يخفى اهتمامه) ليه ؟
ماهو : مش عارف . شكلها كده منصب جديد له .
توتو : منصب إيه ؟!
ماهو : معرفش ، هو راجل ابن حلال وناس كتير بتحبه . هروح دلوقتي أخلص الموضوع ده بسرعة !

(يخرج)

توتو : (لنفسه فى مرارة) منصب جديد ...ميرورا ؟!
يمكن رئيس وزارة! واللا الكاهن الأعظم للدين الجديد !

(وقفة)

لكن إשמعنى ماهو ؟ ليه طلب منه مش منى يروح لميرورا ؟!
يمكن المنصب الجديد هو رئيس الأمن ؟ ..
منصبى ؟!
لا . لا . مش ممكن ، أنا أعطيت عمرى كله لخدمة مصر ، بيحى التتبل ده اللى مالوش صل

ولا فصل يركب ؟!

(لا يستطيع أن يصدق) لا . لا . لا . مش ممكن !

(في حدة - صارخا) لكن ليه بيعت ماهو مش

أنا ؟ ليه ؟!

إظلام

المشهد السادس

نفس الغرفة ، يدخل إخناتون والملكة ام ، يبدو
إخناتون متفانلا على عكس أمه التى تظهر
عليها علامات التوتر بوضوح.

إخناثون: أنا سعيد يا أمى إنك غيرتى رأيك ، إنت هترتاحى هنا ، وأنا متأكد هتجيبى قصر ك والمدينة الجميلة دى ...
تأى : (تقاطععه) شوف بابنى أنا تعبت ، وأيامى قليلة ، أنا هنا عشان حاجة واحدة ، وانت عارفها يا بنى !

إخناثون : إيه ؟
تأى : قلقانة عليك يا بنى، إنت جيت طيبة عشان جنازة أبوك ، ومكملتش السبعين ورجعت هنا وأنا عارفة اللى إنت ناوى تعمله ، (فى توسل) يا بنى ... (تتردد ثم تسكت)

إخناثون : (بيتسم مشجعا) أنا باسمع يا أمى !
تأى : أنا شفت أبوك بيحكم الإمبراطورية دى على مدى سبعة وثلاثين سنة ، وأعرف المصريين إنت دلوقتى فرعون مصر ، لوحدك على العرش.

إخناثون : (فى هدوء) عمرى ما كنت لوحدى على العرش يا أمى !

تأى : أنت شاركت فى الحكم ثلاثاشر سنة.
إخنا تون: (فى دعة) إنت عارفه كويس يا أمى ان ده مش
حقيقى ،عمره ما سمح لى أعمل اللى أنا عاوز
أعمله فعلا و(يتوقف) .

تأى : بسبب أفكارك !
إخنا تون: أفكارى ؟! المنافقين والفاستدين خللوه يعتقد إنه
أعظم فرعون ، وعشان كده لابد بينى هرم رابع
أعظم من الثلاثة الموجودين ، بقالنا سنين
بنضيع البلد عشان أعظم هرم ، بنضيع كل شئ
عشان مقبرة كبيرة ، ولسه مانتهدش !
(وقفة) (فى تصميم) وعمرها ما تنتهى !

تأى : تقصد إيه ؟
إخنا تون: إنت عارفة أقصد إيه ، بتكلمى عن أفكارى !
(وقفة)

بقالى سنتين بابنى المدينة البسيطة دى ، هنا
بدايتى ،التاريخ هيبندى من هنا ، مش هابنى هرم
ليه ، لكن هخللى كل مصرى ببقى هو نفسه
هرم ، التغيير هيبندى من هنا يا أمى !

تأى : (صارخة تقريبا) مش هيسمحوك !

إخناتون : مين هم اللي مش هيسمحولي ؟!

تأى : إنت عارفهم .

إخناتون : الكهنة ؟

تأى : الكهنة وأتباعهم ، وأتباعهم هم كل المصريين .

(وقفه)

(يقترّب منه، وتمسك بيده، فى توسل) أنا بشوف

أحلام وحشة... أنا... أنا (تتوقف محاولة

السيطرة على نفسها ، تتباعد عنه، وتبدو كمن

يسترجع الحلم، فى صوت ضعيف خائف) مش

ممكّن ! أنا مش عاوزك تروح منى !

(صمت)

إخناتون : (يقترّب منها ويمسك بيديها ، فى عاطفة) فين

الملكة الشجاعة اللي وقفت جنب جوزها الملك

السنين الطويلة دى ؟

(بأخذها إلى منتصف المسرح) (وقفه)

إيه اللي شاغلك يا أمى ؟ قولى عاوزة إيه .

تأى : إتعلم حكمة أبوك وأجدادك .

إخناثون : وإيه الحكمة دى ؟
تأى : ما تواجش الكهنة والهيّهم .
إخناثون : (فى هدوء) ربي أمرنى إن هو وحده اللي يتعبد
فى أرضه .

(وقفه)

(ناظرا فى عينيها، فى دفى) أمى، إنتى مصدقأتى؟
تأى : إنت عمرى ما كذبت عليه .

(وقفه)

إخناثون : أمى ، أبويا سمح لى أكون معاه على العرش
سنين قليلة قبل وفاته ، إيه اللي حصل ؟
مانفعش ! وانت عارفة مانفعش !
تأى : مش هو لوحده المسئول !
إخناثون : إحنا الاثنين مسئولين، ما ينفعش إثنين
يحكموا مصر، وإذا كان ماينفعش إثنين يحكموا
مصر، يبقى ما ينفعش بالنسبة للكون، لابد يكون
للكون إله واحد ، ومش محتاجة نبى عشان
يعرفها !

(وقفه)

إنتى بتؤمنى بالله الواحد ؟

تأى : أنا قلت إنك عمرك ما كذبت عليه !

إخنائون : دى مش الإجابة على سؤالى .

(صمت)

تأى : (تقترب منه) إدى لنفسك وقت .

إخنائون : عاوز أبتدى صح .

تأى : الحكمة ...

إخنائون : (مقاطعا) أمى ، بتقولى أبويا وأجدادى كانوا

عاقلين وماوجهوش الكهنة وأصنامهم ، إيه

النتيجة ؟ كل قرية النهاردة لها إله ، والمعابد

أصبحت تجارة كبيرة ، والكهنة أثروا ثراء

فاحش ، والناس جعانة ، حياتها ضنك .

تأى : ما تواجهمش كلهم فى وقت واحد . (وهى تفكر)

أو على الأقل بلاش مواجهة كاهن آمون

الأعظم ، ريبتا ، الراجل ده مش سهل ، ذكى

وله رؤية وجرى .

إخنائون : أنا مبخفش من حد وربى مش هيتخلى عنى .

تأى : حاول حل وسط .
إخناتون : مفيش حل وسط يا أمى .
(تأى تتجه ناحية الأريكة وهي تتمم في انفعال
وياس) (تدخل نفرتي)
(إلى نفرتي) إنت فين يا نفرتي ؟
نفرتي : مشغولة مع البنات .
إخناتون : خليه يشوفوا ستهم الملكة الأم . أنا فى الجناح .
(يقبل يد أمه ورأسها ، ويخرج)
(تجلس تأى على الأريكة ، واضعة رأسها بين
يديها)
نفرتي : تحبى تشوفى بقية القصر مولاتى ؟ (تلاحظ
إشغال تأى فى أفكارها ومخاوفها تماما) أمى
الملكة !
تأى : (تلتفت إليها فى حدة) إنت مش شايقة اللى
بيحصل ، جوزك هيصبع مصر عشان حلم
مستحيل وإنت ولا هنا !
(وقفه)
إنت إيه بالنسبة ليه ؟!

نفرتي : زوجة مخلصه !
تاي : (مدهشة للتعبير على وجه نفرتي الذي لا ينم
عن معنى) زوجة مخلصه! إيه الحكاية
يا نفرتي؟

نفرتي : مفيش حاجة !
تاي : مفيش حاجة ؟! مش ممكن تكوني إنتي نفرتي.
فين نفرتي الطموحة الجميلة اللي نفتها نقاوة
لولي العهد ؟!

(وقفه)

فيه واحدة ست تانية ؟

نفرتي : لا .
تاي : الحريم ؟ بيشفهم ؟
نفرتي : أبداً.
تاي : عشان خلفته بنات معندوش ولد ؟
نفرتي : (تشيح بوجهها بعيداً) معرفش ! حقي معرفش !
حاسة إن فيه حاجة واقفة بيني وبين قلبه !
تاي : الكلام ده يقاله أد إيه ؟
نفرتي : من يوم ما تجوزنا !

تاي : (في دهشة) إنتي مجنونة ؟ إنتو متجوزنين
بقالكم سنين وعندكم عيال !
نفرتي : ربما أكون أنا السبب .
تاي : إزاي ؟
نفرتي : أنا من أسرة عادية ، ومعرّش أكون ...
تاي : (في حدة) كلام فارغ ، أنا كمان من أسرة
عادية .

(وقفه)

قصّداك نقولى إنه باعدك عن كل حاجة ؟
نفرتي : لا يا أمى الملكة، مش عارفة أقولها ليكى إزاي !
(تحاول) هو أب عظيم وزوج عظيم ، بيخاف
على شعورى قولى لكن (تتردد وتقف) .
تاي : لكن إيه ؟
نفرتي : فيه فى قلبه وعقله حاجة مش قادرة أوصل لها!
تاي : (وهي تنظر فى عينيها) متعرفش هو هيعلم إيه
فى حفل التتويج بعد يومين ؟!
نفرتي : عارفة زى كل اللى فى القصر .
تاي : لا يا نفرتي إنتي مش زى اللى فى القصر !

(تحاول أن تقف ، فتجري نفرتيتي لأخذ يديها
ومساعدتها على الوقوف)
إنتي لسه طفلة . لابد تثبتي ليه ولنفسك إنك مش
زى كل اللي في القصر ، لابد تشاركيه في كل
حاجة ، وتكوني دايما معاه لما يحتاجك .
نفرتيتي : عمره ما احتاجني ولا طلب...
تاي : (مقاطعة) مش ضروري بطلب ، فين ذكائك يا
نفرتيتي ؟!

(وقفه)

جوزك في خطر وانتى بتتصرفي زى طفلة !
فين حور محب ؟ مع مين ؟
نفرتيتي : يعنى إيه مع مين ؟
تاي : يعنى رأييه إيه في اللي هيعمله ابني ؟
نفرتيتي : معرفش !
تاي : (مصدومة) متعرفيش ! أختك زيمات مراته
ومتعرفيش ! آخر مرة شفيتها إمتي ؟
نفرتيتي : مرة واحدة من يوم ما جت من طيبة .
تاي : مرة واحدة !

(وقفه)

(تفكر مليا) فهي حاجة بتحصل ! اسمعى يا
نفرتي ، انتى متعرفيش الدنيا كويس ، لكن
انا تاى ، زوجة امونحوتب الثالث العظيم ، شفت
كثير وميخدعنيش الكلام المعسول ولا عبارات
النفاق فى القصور ، عمرك ما تسمحى لحد
يخدعك .

(وقفه)

فيه مهمة عاجلة ليكى يا نفرتي .

خير ؟

نفرتي :

عاوزه اعرف اللي فى دماغ حور محب ، إنتى
تشوفى أختك وبذكاء تعرفي ايه اللي بي فكر فيه
جوزها فعلا ، جوزك ناوى يواجه الكهنة ويحطم
معابدهم ، ولازم نعرف رأى قائد الجيش .

انا مستعدة اعمل أى حاجة عشان جوزى .

نفرتي :

عارفة يا نفرتي ، حاولى تشوفى أختك حالا
دلوقتى .

تاى :

نفرتي : دلوقتي ؟
تاي : أيوه ، مفيش وقت نضيعه ، أنا حاسه فيه
حاجة بتحصل !

(تخرج نفرتي)
(إلى نفسها) ريبتا...الكاهن الاعظم ريبتا. نفس
الحدوتة القديمة!

إظلام

المشهد السابع

غرفة في بيت حورمحب ، تضجع زوجته
زيمات على الأريكة مستمعة إلى الأختين تارا ،
وهما ساحرتان متقدمتان في السن يبدو بوضوح
أن زيمات مخمورة ، تتابع بغير اكتراث ما
تفعله أو تقوله الأختان.

تتحرك الساحرتان في شكل دائرة ، بينما
تقرعان الدفوف في بطن ، ثم تتوقفان وتجلسان
على الأرض في مقابيل زيمات ، ويفتحان
زجاجتين مليئتين بالرمال ، وتنتراه على أرض
الغرفة ، ضاربتين الدفوف في حركة ميكانيكية
عنيفة تؤدي في النهاية بهما إلى حالة أشبه
بالغشية والنشوة معا.

- تارا ١ : شايقة ... شايقة الرمل ها يطير.. يطير فوق.
تارا ٢ : بس الأول تحت. لابد يطير تحت.
تارا ١ : مش كثير .
تارا ٢ : العظمة والملك ف سكتك !
تارا ١ : شايقة التعبانين !
تارا ٢ : وتاج مصر !
تارا ١ : على رأسك !
تارا ٢ : وعلى رأسه !
زيمات : كدابه إني وهي ، سنين وانتو بتكدبو عليه ،
مفيش غير الكذب !

تارا ١ : (صارخة دون النظر إلى زيمات) لا ... الرمل
عمره ما يكذب!

(وقفة)

تارا ٢ : (مملية النظر في الرمل) الخطوط والعلامات !
تارا ١ : شايقة الخراب !
تارا ٢ : مدينة بتتحرق !
تارا ١ : رماد ف رماد !
تارا ٢ : والتاج بيتحرك ، جايلك ، جايلك !
زيمات : (ضاحكة) جايللى أنا وخور محب ؟ طب هنعمل
إيه ؟
تارا ١ : لا شئ !
زيمات : (متعجبة) لا شئ ! (ساخرة) مش هناخد حاجة
إذا معملناش حاجة!
تارا ٢ : غلط ، هاتخدو كل حاجة عشان مش هتعملو
حاجة!
تارا ١ : عمر ما كان اللاشئ لا شئ !

زيمات : (فى نفاذ صبر) كلامكم الغاز يا سحرة !
تارا ١ : تعالى هنا تعالى ، وخطى الخطوط والعلامات .
تارا ٢ : سبع مرات .
(تنهض زيمات وفى يدها الكأس ، وتسير بغير
ثبات إلى حيث الساحرتين ، ثم تبدأ فى الخطو ،
بينما تعد الساحرتان)
(تدخل نفرتيتى ، وتتدهش لما تراه ، فتقف
شاخصة إلى زيمات والساحرتين)
نفرتيتى : إيه ده اللي بتعملوه يا زيمات ؟ !
زيمات : (وهى تعود إلى الأريكة ، ضاحكة) لا شئ !
(إلى الساحرتين) قولوا لملكة مصر إحنا
مبنعملش حاجة!
نفرتيتى : (إلى الساحرتين) إنتى وهى ، بره ! بره !
(تهرع الساحرتان للخارج)

(وقفة)

زيمات : (لنفسها بصوت عال) نفرتيتى... أختى ، ملكة
مصر هنا إيه الشرف والتكريم ده !
نفرتيتى : إنتى لسه بتصدقى الأوهام دى ؟
زيمات : هو إنت مبتحبيش الأوهام ؟ ليه ؟! كنتى ف
يوم من الأيام بتحبيها، فأكرة الراجل العجوز
اللى قال لنا هنبقى إحنا الإثنين ملكات مصر،
كنا أختين صغيرين و...
نفرتيتى : (مقاطعة) زيمات...
زيمات : دلوقتى إنت ملكة مصر ، عشان كده معدتيش
بتحبي الأوهام ! (تضحك ، فى سخرية) تعرفى
إنتى إيه ؟ ... إنتى ملكة الواقع ، طول عمرك
وإنت ملكة الواقع !!!
نفرتيتى : (مقاطعة) إنتى سكرانة.
زيمات : عمرك ما حبيتى الأوهام ، أيوه ، ملكة الواقع.
(ضاحكة) ده الشئ الوحيد اللى بحسبك عليه ...
(تشرّب) تعرفى امنا وإزاي تبيعى نفسك...
نفرتيتى : (وهى تأخذ الكوب منها) خلاص ،
إنتى مش واعية بنفسك !

زيمات : كنتى أول واحدة تعلنى إيمانك بالله الواحد،
ساعتها مفهمتش، لما قللى لايونا يروح للأمير
يقول له إنك خلاص سيبتى كل الالهة ويتؤمنى
بالله الواحد ، مفهمتش ، لكن فهمت بعد كده فى
حفل السد لما شفتك بترقصى، وتستعرضى
جمالك قدام الكل ، خاصة (تتردد) خاصة
حورمحب...

نفرتيتى : (تقاطعها فى غضب) إخرسى !
زيمات : (فى هذيان) شفتك ساعتها بتبصى له ، يوميا
ما نمشيش وقعدتى تحلمى وتكلمى عنه ، فأكرة...
نفرتيتى : إنتى مجنونة ؟!
زيمات : (مبتعدة عنها فى غير ثبات) تانى يوم الملكة
تاي اختارتك لابنها المريض البشع، اللي
رضيتى بيه، ونسيتى فتى الأحلام، جوزى،
عارفة ليه .. عشان إنتى ملكة الواقع .. إنتى ...
نفرتيتى : (تقاطعها صارخة) إخرسى، إخرسى !

(وقفه)

إنّتى مش فى عقلك !

(صمت)

زيمات : أنا سكرانة .. واللى أنا بقوله ده كلام... أنا بس

بعاكسك ،(ضاحكة فى تشنج) ياما قلنا أنا وانتى

أكثر من كده قبل ما تتجوزى الأمير وأنا أتجوز

أتجوز حورمحب.

نفرتي : (تقاطعها فى سرعة) أنا جاية ليكى هنا لأننى

مشفكيش من زمان.

زيمات : (تتمتم) أنا ليه الشرف يا نفرتي ، أنا كنت بس

بعاكسك، ياما قلنا أنا وانت كلام أكثر من كده

يكتير لما كنا صغيرين.

نفرتي : الوضع دلوقتى مختلف.

زيمات : صحيح... الوضع مختلف ، إنّتى دلوقتى الملكة !

(وقفه)

نفرتيتي : ايه اللي جراك يا زيمات ؟ افكرت انك ها
تبقي سعيدة لما تشوفيني.
زيمات : طبعا...طبعا. (تشرب) انا فعلا سعيدة.
نفرتيتي : انتي أختي ، ودايما هكون جانبك لما تحتاجيني،
وأنا متأكدة انك برضه هتكوني جانبي لما
أحتاجك.

(صمت)

طبعا هتحضري حفل التتويج. هنروح سوا.
زيمات : طبعا.
نفرتيتي: فيه بعض المشاكل ، بس ربنا معانا ، ومش
هيتخلا عنا.
زيمات : (تشرب) طبعا ، فيه مشاكل ، والإشاعات في
كل مكان، وده غضب من امون وكل الالهة.
نفرتيتي : كلامك زى كلام الكهنة الملاعين.

(وقفه)

زيمات : (ضاحكة في هيستريا) أنا مش غبية يا نفرتيتي !

نفرتيتي : قصدك ايه ؟

زيمات : إنتي عاوزة تقولى ليه إنك بتؤمنى بالدين الجديد

والإله الواحد ؟ أنا عارفك !

نفرتيتي : أيوه أنا مؤمنة ومخلصة فى إيمانى.

زيمات : إنتي مؤمنة ومخلصة بس لطموحك اللى مالوش

حدود. وإنتي عارفة ده كويس.

نفرتيتي : (تقف ، فى غضب) انا مخلصة وصادقة.

زيمات : إكلمى عن أى حاجة غير الصدق أنتي مش

ممکن تكونى صادقة ، ده عيبك اللى مالوش حل !

نفرتيتي : متعرفيش تخبي حقدك.

زيمات : لا مش حقد ، أنا بس بقول الحقيقة، لأنى بكر

الكذب ،إنتي متقدريش تكونى صادقة، وعشان

طموحك تعملى أى حاجة تغيرى دينك...

تكذبى حتى على نفسك وتقولى إنك بتحبى
جوزك المريض البشع ... حياتك كلها كذبة
كبيرة...

(فى نهكم) تقدرى تواجهى نفسك وتقولى لها
(تتوقف، فى جنون) وتقولى لجوزك إنك عاوزاه
واجوزتيه عشان العرش ؟
(وقفة) تقدرى تقولى له إن حورمحب كان
ويمكن لسه، فتى أحلامك!!

نفرتيتى : (مصدومة ، تخطو ناحيتها وتمسك بذراعيها فى
عنف) عمرك ما ها تتغيرى، نفس الشر الأسود..

(صمت)

(تتجه ناحية الباب ، وعينها تنبني عن تيقظ
عنيف في روحها إلا أنها تحاول ان تبدو
متماسكة وهي تخرج ، في مرارة والم) ...
ياه ... عمري ما تخيلت انك شايمة كل الحقد و
الكراهية دول لية !

إظلام

(نهاية الفصل الأول)

الفصل الثامن

المشهد الأول

الوقت ليل متأخر ، وفي أحد الأرقعة الفقيرة في
قرية على الجانب الآخر من النيل ، إختاتون في
ملابسه العادية ، يصغى السمع إلى صراخ
وبكاء أطفال يأتي من بيت قديم معزول ، يبدو
أن بيك غير مرتاح لوجوده في مثل هذا المكان
إلا أنه لا يظهر ذلك .

بيك : مولاي ،أنا مش فاهم ، أقصد مش شايف النظرية
 فى وجودنا ... (يتردد ، ناظرا حواليه) يعنى
 يا مولاي ناخذ مركب فى الليل ده ونيجى
 لحنة مقطوعة،باين عليها الغلب والفقر
 إخناتون : (مقاطعا) هس ، إنت سمعت ده ؟
 بيك : إيه ؟
 إخناتون : ده ؟
 بيك : ده إيه يا مولاي ؟
 إخناتون : حد ببيكى !
 بيك : (يصغى ، فى غير اكتر اث) عيال
 بتيكى قبل النوم...
 إخناتون : مش بالطريقة دى !
 بيك : (فى إرتباك) مش فاهم ، عيال ! ...
 عيال بتيكى عشان هم عيال ، أقصد إنه
 عادى وبعدين ...
 إخناتون : (متجها ناحية المنزل مصدر الصوت) لا . لا .
 (يدق على باب المنزل، تظهر امرأة عجوز
 واهنة البنيان) فى إيه يا أمى ؟
 المرأة العجوز: مفيش حاجة.

إخنا تون : عيالك ببيكو ... ليه ؟
المرأة : (بعد تردد) جعائين !
إخنا تون : جعائين ! ليه ما بتأكلهمش ؟!
(وقفة)
المرأة : معندناش أكل.
إخنا تون : (مصدوما ، يخطو إلى الداخل) معندكيش أكل!
(ينظر أمامه فيجد طفلتين صغيرتين في ملابس بالية ، تكيان وجوارهما وعاء من الفخار على النار ، يتصاعد منه البخار)
إننى بتطبخى أهه ؟ (يرفع غطاء الوعاء ، فى شك) بتطبخى إيه ؟!
المرأة : (فى عجز يائس) شوية أحجار !
إخنا تون : (مصدوما على نحو بالغ) أحجار ؟!
المرأة : لغاية ما ينامو .
(تحاول أن تسيطر على دموعها) معنديش حاجة اطيخها لهم.
(صمت)
(ينظر إخنا تون إلى الوعاء ثم إلى الطفلتين ، ويندفع بعدها إلى الخارج ، وخلفه بيك ، تبدو على

وجه المرأة الدهشة، ولكنها تتحرك في حزن
إلى الطفلتين اللتين تصاعد بكائهما، تحاول
تهنئتهما وهي تغطيها، خلاص يا حبايبي...
خلاص ... ربنا كريم... ربنا مش هاسينا...
(على نحو غامض تستجيب صرخات الطفلتين
لعجز وبأس المرأة ، فتخفت الصرخات وتصبح
مهمات ضعيفة حزينة)
(يغم المسرح إطلام كامل ويأتي صوت الناي
حزينا وحيدا موحشا)
(يدخل إخناتون يهرول عائدا وهو يحمل فوق
كتفيه كيسين من الحبوب والطعام - متجهما
ناحية المنزل يتبعه بيك)
خليني أشيل عنك يا مولاي.
لا ... ها يسألني أنا ، مش إنت.
مين اللي ها يسألك يا مولاي ؟!
ربنا... ربنا ها يسألني عن الفقرا والمساكين.
(وهو يخطو داخل المنزل) دول مسئوليتي.
(يضع الحبوب والطعام، إلى المرأة محاولا
الابتسام)

بيك :

إخناتون :

بيك :

إخناتون :

ده ليكى إيتى والبنتين. (وقفه) دول بناتك ؟

المرأة :

بنات إبنى.

إخنائون :

وفين إبنك ؟

المرأة :

مات فى الحرب،مراته سابت البيت والبنات ليه.

(وقفه)

إخنائون :

(كمن قرر شيئاً) عاوزة حاجة ثانية يا أمى ؟

المرأة :

ربنا بخليلك يا بنى.

(يتجه نحو الباب للخروج) يا ريت يا ابنى

(يلتفت إليها)

يا ريت كان اللى بيحكمونا زيك !

(بفاجأ إخنائون ، لكنه يلتفت متجهاً إلى الخارج)

(خارج المنزل يقف إخنائون متأملاً فى أسى)

إخنائون :

(إلى بيك) طب والناس الثانية ؟

(بيك لا يعرف ما يقوله)

فيه ناس كتير زى الست دى منعرفش عنهم

حاجة، وربنا هيسألنى عنهم، آلاف كتير زى

الست دى ، أيوة ناس كتير فى مصر مش

لاقين ياكلوا بيموتو من الجوع والكهنة

وأتباعهم الفاسدين أخذوا كل حاجة !

(وقفه)

(فى مرارة) وكان كل همهم يشن الحروب ويبنى
الهرم وتمائيل كبيرة ملهاس معنى ! (ملتفتا إلى
بيك) فين الفن بتاعك من الحقيقة اللي شفتها
الليلة دى يا بيك ؟!

(وقفه) ضيعت فنك وموهبتك فى رسم زيف
ملوش معنى ! ليه ؟! ليه ؟!

إظلام

المشهد الثانی

قصر إخناتون ، نفس القاعة ، تدخل
الملكة الأم تاي ، ونفرتيتي.

- تای : (فی نفاذ صبر) ده مش وقت إجابات غامضة.
- نفرتی: (مرتبكة ، مازالت نظرة التيقظ تسكن عينيها) مش عارفة، (لنفسها تقريبا) هي زيمات دايما كده.
- تای : أنا ما بتكلمش عن زيمات ، باتكلم عن جوزها حورمحب ، مع مين هو ؟
- نفرتی: الأمير طبعاً.
- تای : عرفتي منين ؟ قصدي إزاي قالت ليكي ده ، والا سمعيتها من حور محب نفسه ؟
- نفرتی: ما كانش موجود ، (وهي تفكر) كلام ... كلام زيمات بيقول كده.(وقفه) أمي الملكة (تتردد) حضرتك مصدقة اينك ؟ قصدي بتؤمنى بالله الواحد؟
- تای : (متحاشيه النظر إليها ، تسير إلى الأريكة) أنا تعبت، وأيامي قليلة.
- نفرتی: (في استجداء) حضرتك بتؤمنى بالله الواحد الذى لا إله إلا هو ؟
- تای : (تجلس) أيوه.

نفرتيتي :

لكن ما قلتيش أبدا لإبنك !

تاي :

إنتي وابني لسه أطفال ، معرفتكم بسيطة بالعالم
وحقيقتّه ، أنا بكره الكهنة الحيثا. وعارفة إنهم
أعدائنا رغم إنهم بيتظاهروا إنهم أصنقائنا ،
قوتهم وثرواتهم زادت قوى بمرور السنين ،
وأصبح كاهنهم الأعظم فرعون ثاني ، ورغم
الظاهر إنهم بتوع عبادة ، الحقيقة إنهم وحوش،
استفحلت ، نهبت وسيطرت على كل حاجة ف
بالبلد، لكن دى حقيقة ... وحقيقة مرة مصر
عايشاها من مئات السنين ، وبقالننا سبعة
وتلاتين سنة بنتعامل معاهم بدهاء وحكمة ، وده
اللى عاوزاكى انتي وابني تتعلموه.

(وقفة)

المواجهة الصريحة معاهم كارثة !

نفرتيتي:

مش كان أحسن إبنك يعرف إنك بتأيديه ومؤمنة

بالله الواحد زيه؟

(مدركة ما تثيره كلماتها من ألم) إخناتون واقف

وحده !

تأى : لا . ده مش التأييد اللي يحتاجه ، لابد يعرف إن
اللى بيصنع الفرعون ويهدمه هم الكهنة !
(صمت)

وأنا عاوزاكي تساعديه إنه يفهم الحقيقة دى !
نفرتي : (تبدأ فى اكتشاف ما تريده وتؤمن به حقيقة)
مقدرش !

تأى : (تقف) لا . تقدرى يا بنتى !
(تخطو ناحيتها) حاولى تاخدى فكره بعيد عن
فكرة الإله الواحد.

نفرتي : ده حقيقة عايشها ، ومحدث يقدر يغيره.
(وقفه)

تأى : تحبى تشوفى جوزك بيدمر نفسه ؟

نفرتي : لا طبعا.

تأى : إذن اعملى كل اللي تقدرى عليه عشان تحمى
جوزك والعرش يا نفرتي ، إنتى الملكة
دلوقتي ، أنا حاربت كثير عشان جوزى
والعرش ، بس تعبت وعجزت ومعادش فيه حيل
ولا صحة . (تتجه للخروج) أنا ليه الراحة
دلوقتي .

(تخرج)

نفرتي : (فى يأس - لنفسها) أنا مقدرش أكون زيك يا
أمى ، مفيش حاجة أقدر أعملها ، إخناتون
لوحدته ببواجه العالم ومش عارفة أقف جنبه
إزاي.

(وقفة)

أختى بتحسدنى... يمكن أنا زى ما بتقول مش
صادقة وده العقاب؟ ... لا أنا صادقة ...
ومؤمنة بريك يا إخناتون ، إنت بتقول ربنا
يعرف اللي فى قلوبنا ، وأنا صادقة وربنا
عارف...

(تأتى موسيقى عذبة مصحوبة بتراتيل جماعية
من داخل القصر ، نفرتي تصغى فى تأثر إلى
كلمات التراتيل : يا رب الجميل يا جميل يا رب
ف حبك بتعيش القلوب ، وتغنى الطيور
نورك جوايا وما ليش غيرك يا رب !
(وهى تسجد) نورك جوايا وما ليش غيرك يا
رب!

(باكية) نورك جوايا يا رب ، يا رب إنت

عارف إني صادقة !
 (تضع رأسها بين يديها) مليش غيرك يا رب ،
 متسبينش ، متسبينش يا رب !
 (يدخل إخناتون)
 إخناتون : (يلحظها) إنتي هنا لوحديك يا نفرتيتي، آمال فين
 أمي ؟
 (وقفه)
 (يقترّب منها) إيه اللي حصل ، خير ؟!
 نفرتيتي : (تحاول أن تخفي دموعها) مفيش حاجة.
 إخناتون : (ممسكا بيديها، يأخذها إلى منتصف المسرح ،
 في حب)
 فيه إيه يا نفرتيتي ؟!
 (وقفه)
 نفرتيتي : (تحاول أن تستجمع شجاعتها) أنا عاوزة أقول
 لك حاجة يا إخناتون ... حاجة يمكن تشوف
 إنها غريبة خاصة بعد سنين من جوازنا...
 لكن ... (في حسم) لايد أقولها ليك.
 إخناتون : (مبتسما) خير .
 نفرتيتي : أنا آمنت بالله الواحد قبل ما شفتك.

إخناثون :

وكننت أول امرأة تدخل الدين الـ....

نفرتيي :

(مبتعدة عنه) لو سمحت خسليني أقول كل اللي
عندي... أيوه ... كل اللي عندي . (وقفه) في
يوم من الأيام سمعت أبويا بيرتل التراتيل
الجميلة اللي إحنا سامعينا دلوقتى ، سمعتها
وحسيت إنها بتسرى فى روى ، سألت أبويا ،
معلمك ، عنك وعن ربك ، حكا لى عن عقلك
وكماله وعن صدقك، بعدها لقيت نفسى فى
لحظة غريبة باشهد إن لا إله إلا الله ، الخالق
القادر وفى حفل سيد شفتك لأول مرة ، بالنسبة
ليه كان بيت الفرعون والأمير حلم جميل
وأسطورة مثيرة شدت لى الفرائشة اللي
بتتشد للنور وبعدين (لنفسها تقريبا) وبعدين
تتحرق بيه...

(وقفه)

إخناثون :

(فى عاطفة دافئة) نفرتيي... بلاش تبقى قاسية
على نفسك.

نفرتي : (في إصرار) أول مرة شفتك إخضيت، أقصد ،
(تتردد) في البداية حسيت إنك مش ممكن تكون
فتي أحلامي.

(صمت)

بعد الجواز بقيت أصلى وأطلب من ربنا يكلمني
زي ما كلمك يقوللي إزاي أحبك ، أمي قالت ليه
ياما أزواج وزوجات عاشوا بدون حب ، سنين
وأنا خايفة إنك في يوم تسألني إنتي بتحبينني يا
نفرتي ؟ كنت متأكدة إني مش هقدر أكذب
عليك، الغريب عمرك ما سألتني !

إخنا تون : إنتي كنت أول إمراة تدخل الدين ، وده
بالنسبة ليه أكثر من كفاية يا نفرتي.

نفرتي : (في توسل) أنا ما بتكلمش عن ربنا يا إخنا تون،
أنا باتكلم عنك وعني ، إمبراح إنت قلت عاوز
تبتدي صح وأنا عاوزة إحنا نبتدي صح هنا
الأول... في بيتنا .. هل ده ممكن ؟

(وقفه)

إخنا تون : ربنا وحده يقدر يغير القلوب يا نفرتي.

نفرتي:

عارف يا إخناتون... لما انت رحت الجنازة في
طبية وغيب ، لقيت نفسي بفكر فيك طول
الوقت، أيوه طول الوقت ، مكنش أعرف
إنك عايش جوايا كده.. وانت بعيد عرفت إن
من غيرك معرفش أكون سعيدة ، كنت
عاوزاك ترجع بسرعة، أنا...أنا كنت بشم
هدومك ف الدولاب، كنت عاوزاك ترجع
عشان أقول لك إن بعادك علمني إني مقدرش
أعيش من غيرك، (تطوق بزراعيها عنقه) وإني
بحبك يا إخناتون.

إخناتون :

أنا كمان بحبك يا نفرتي. (وقفة) الحمد لله.
(يتحرك بعيدا لكن في هدوء) نفرتي ، أنا كنت
عارف كل اللي قلتيه ده، لما اتقابلنا أول مرة
في الحفلة، شفت عينيكي وحيرتك، أنا عارف
نفسى كويس يا نفرتي ، أنا لا منظر ولا وسيم
زي حور محب مثلا...

نفرتي :

(تأتي له ثانية، في عاطفة مشبوبة) لا يا
إخناتون ، إنت حبيبي، عيني وقلبي ميشوفوش
غيرك وربنا عارف ... ربنا عارف.

وسامحنى، ماكنتش أعرف إنك كنت عايش
وبتفكر فى حاجات زى كده، ورغم كده عمرك
ما قلت كلمة تجرح شعورى !

إخنا تون :

مقدرش يا نفرتيتى، ولا هقدر، لأنك هدية ربنا
الحلوة ليه.

نفرتيتى :

(تركع وتقل يديه) بحبك ... وبحب ربك يا
إخنا تون!

إخنا تون :

(ياخذ يديها فى يديه ، ويقودها إلى منتصف
المسرح)
بحبك يا نفرتيتى.

(يحتضنان فى عاطفة عميقة مشبوبة)

نفرتيتى :

من النهاردة مش هتبتعد عنى ولا هبتعد عنك،
عاوزه أبقى زى أمى الملكة اللى وقفت مع
جوزها فى كل حاجة ، ويا ريت يا إخنا تون
تشاركنى معاك فى كل شئ.

إخنا تون :

(يبتسم ناظرا ناحية الباب حيث تأتى

أصوات)(يدخل ماهو)

أيوه يا ماهو ؟

ماهو :

ميرورا هنا يا مولاي.

إخناثون : خليه يدخل (مازال يبتسم، إلى نفرتيتي) ،

عاززة تشتغل معايا؟

(يأخذ يديها ويقودها إلى الأريكة) إتفضلتي ، دي

البداية ، أقعدى جنبى هنا ، إنت اللى طلبتى !

(يدخل ميروا، ينحنى)

(إلى ميروا) أهلا ميرورا . إنت عارف بعنت

لك ليه ؟

ميرورا : لا يا مولاي.

(وقفة)

إخناثون : (يقف ويبتعد عن الأريكة) عاوز مساعدتك.

ميرورا : أنا خادم مولاي.

إخناثون : عندى لك وظيفة هنا، لكن الأول فيه أخبار

كويسة!

(وقفة) الهرم اللى ضيعنا فلوس البلد عليه

ومخلصش ... خلاص ، مفيش هرم ، كل

العمال يرجعوا بيوتهم وغيطنهم، من النهاردة

مفيش أهرامات ولا حروب... (يلاحظ السعادة

والمفاجأة على وجه ميرورا) بخصوص عملك

الجديد ... إنت سمعتك كويسة، أمين وبتخاف

ربنا (ينظر إلى نفرتيتي التي تبتسم موافقة) ...
عاوزك يا ميرورا تصلح حاجات كتير هنا في
القصر وعلاقته بالناس.

(وقفه)

أنا اخترتك يا ميرورا كبير الوزراء وأمين
القصر.

ميرورا :

أنا أخدم مولاي ووطنى فى أى مكان. (فى
حرص) وطبعاً عملى هيكون مع ماهو رئيس
الحرس ، وتوتو رئيس الأمن...

إخنا تون :

إسمعنى يا مورورا كويس، إنت هتبقى مسئول
عن كل حاجة فى القصر والبلد ، أنا عاوز
أعرف كل شئ ، عاوز تقارير صادقة مش
عاوز كذب وافتراءات على الناس ، عاوز كل
مصرى يشعر إني قريب منه وحاسس بيه
وبمشاكله.

ميرورا :

(ينحنى) أدعو الله أن يوفقنى وأكون عند حسن
ظن مولاي.

إخنا تون :

إنن استعد من الآن ، متجيبش سيرة وتبدأ بعد
التتويج مباشرة.

(ميرورا ينحنى ويخرج)

(وقفة)

نفرتي : أنا خائفة يا إخناتون.

إخناتون : من إيه ؟

نفرتي : كهنة آمون والآلهة الثانية و(تتوقف)

إخناتون : (بهذه) إنا ربنا معانا.

نفرتي : قصدي إنا ممكن نأجل إعلان الدين الجديد،

نخليه بعد التتويج، أنا سمعت إن الفرعون

الجديد لابد يتوجه كهنة آمون والآلهة الثانية.

إخناتون : مش محتاجهم ، التتويج هيجصل في عز النهار،

قدام المعبد في الشارع بين الناس البسطا

وربنا شاهد وبيبارك.

(صمت)

(يمسك بيدها ليقودها إلى منتصف المسرح،

تخفي إضاءة المسرح إلا من بقعة تغطيها

وخاصة وجهيهما والسعادة الحقيقية التي

تغمرهما، تبدو نفرتي مسحورة بصدق وعفوية

كلمات إخناتون الذي أسره هو الآخر حب

نفرتيتى الصادق له وخوفها عليه البادى بجلاء
على وجهها الجميل).
(تأتى من على البعد موسيقى التراتيل العذبة)
بحب وشك ، حلو قوى .
(وقفة)

ما تخافيش يا نفرتيت ، أنا عارف التغيير كبير
ومش سهل، لكن ده أمر ربى ، والتغيير ده
لصالح شعب مصر اللي استعبده الكهنة
وأتباعهم آلاف السنين ، الكهنة صنعوا من
الفرعون إله عشان مصالحهم، وهم كمان
أصبحوا فراعنة، والبلاد كلها أصبحت فراعنة
وعبيد، ناس عايشة وناس مش لاقية تاكل. (فى
حسم) لابد من التغيير ، لابد واحد يقف ويقول
لا ، أنا الواحد ده، ربنا اختارنى (فى صوت
متهدج صادق) مفيش آلهة على الأرض يا
نفرتيتى، وهبدأ بنفسى وأكون الفرعون الأخير،
هعيش ذى كل المصريين العاديين ، ألبس
وأكل وأشرب زيهم ، ده اللي عاوزه ربنا منى.
(وقفة)

عندنا شغل كثير بعد التتويج ، هنبنى كل شئ
من جديد ، مفيش ظلم ولا فساد ، المصريين
هيعيشوا الحياة الكريمة اللى يستحقوها ، ياما
شفتهم بيعانوا والقصر بيحتفل بأكاذيب !

نفرتي : غريبة!

إخناون : إيه ؟

نفرتي : عمرك ما حبيت حياة القصر فى طيبة، ودايما
تحب الوحدة ؟

إخناون : عمرى ما حسيت إنى منهم... أنا (يتوقف)

نفرتي : (فى إصرار) إيه !؟

(وقفه)

إخناون : (يتحرك بعيدا عنها للخروج) أنا ... مش عاوز
أتكلم...

نفرتي : (تتابعه ، أكثر إصرارا) عشان خاطر قول لى ،
مش عاوزاك تكون لوحذك تانى أبدا.

إخناون : إتعودت خلاص على الوحدة !

نفرتي : ضرورى فيه سبب.

(صمت)

إخنائون:

فيه بداية يمكن نقول عليها سبب، من سنين
أجبرني أبويا الملك اطلع معاه ومع أخويا
تحتمس نصطاد فرس البحر، اللي هاج ووقعنا
كلنا في المية، مقدرتش أعوم ولقيت نفسي بغرق،
كنت بموت، وصرخت... ناديت ربنا وسمعته بيقول
ليه إنت هتعيش عشان تعيدني، معرفش لقيت نفسي
إزاي على الشط... وعرفت إن أخويا مات في
المعركة مع فرس البحر، (في مرارة شديدة)
الموج كان عالي وشديد، الملك ما شافش وهو
بيضرب فرس البحر، أصاب ابنه، أخويا تحتمس.
عمرى ما هنسى اليوم ده محدش كلم حد لغاية ما
وصلنا القصر، وفوجئت بالملك أبويا بيقول أغرب
حاجة !

نفرتي:

قال إيه ؟

(وقفة)

إخنائون:

قال يا ريتك مت وأخوك هو اللي عاش !
(صمت) في اليوم ده إحساس غريب وصلني...
حسيت إن مش بس أخويا مات، لكن كمان أبويا
وأمي ضاعوا مني ! .. أيوه كلهم ضاعوا مني،

والدنيا معدتة هي الدنيا ، بعدها اتعلمت الاقلى
نفسى فى وحدتى !

إظلام

المشهد الثالث

منتصف الليل ، في كهف بجبل قرب مدينة تل
العمارنة، يقف الكاهن الأعظم في الوسط
مستغرقاً في أفكاره ، بينما الكاهنان الثاني و
الثالث وتوتو ينتظرون في توتر أن ينتهي
الكاهن الأعظم من تفكيره ويتكلم.

الكاهن الأعظم : (ملتفتا إلى توتو ، في تهكم) ان غدا يتم

تتويجه بين الناس مباركا من إلهه ؟!

توتو : نعم يا سيدى.

الكاهن الأعظم : أين ؟

توتو : ف الساحة اللى أمام المعبد.

الكاهن الأعظم :متى ؟

توتو : ف منتصف النهار.

(وقفه) الملكة تاي واتنين من كبار المواطنين

هيليوسوه التاج.

الكاهن الثالث :الملكة تاي داهية ويحبها الناس ، وأخشى أن

هذا قد يدمر كل شئ !

الكاهن الأعظم : (يزرع المكان جيئة وذهابا - إلى توتو)

وهل مازال ينوى إعلان الدين الجديد ؟

توتو : وأيضا إلغاء كل الديانات الأخرى !

(صمت)

الكاهن الأعظم : (يتوقف فى هدوء وثقة) ونحن مستعدون.

(إلى الجميع) لا نوم لنا الليلة. (وقفه) لا يجب

أن نسمح لحور محب أو ماهو بحضور

الاحتفال. أنا سأتولى حور محب . (إلى توتو)

وأنت تتولى الملكة تاي وماهو، لا يجب أن

يحضرا الاحتفال.

توتو : أمرك يا سيدى.

(وقفه) وماذا نفعل مع ميرورا ؟

الكاهن الأعظم : (مبتسما فى تحدى) غريمك ؟!

توتو : أرسل له بالأمس .

الكاهن الأعظم : لماذا ؟

توتو : لا أعرف ، لم يرسلنى إليه بل كلف ماهو بذلك.

الكاهن الأعظم : وهل قابله ؟

توتو : نعم ، لكن لم يعلن شئ بعد اللقاء ، ميرورا ربما

يعين كبير الوزراء !

الكاهن الأعظم : أو ربما رئيس الأمن الجديد، أنت قلت أنه

أرسل ماهو ولم يكلفك أنت !

توتو : (فى قلق بالغ) ربما !

الكاهن الأعظم : (وقفه) أعدك يا صديقى ، لن يكون هذا أو

ذلك، (إلى الجميع) والآن أصغوا إلى جيدا يا

أصدقائى، أمامنا غدا خيارين لا ثالث لهما: إما

أن نخرج من هذا التحدى أو نخسر كل شئ

ونموت جبناء ، الخطأ غير مسموح به ،

(وقفه)

(إلى الكاهن الثالث) غدا ، وقبل ظهور الكافر بدقائق قليلة، يتواجد عشرون من رجالك فى الصف الأول وينتظروا إشارتك ، أيضاً يجب أن تحسن توزع بعض من الرجال بين الجمهور للسيطرة عليهم.

(وقفه)

(إلى توتو) عليك أن تستبدل ثلاث من حرس العرض بثلاثة من رجالنا ، هؤلاء الرجال يجب أن يلاصقوا الكافر طوال العرض.
(إلى الجميع) والباقي تعرفونه !
(يدخل الكاهن الأول ، ويبدو منزعجاً)

الكاهن الأول : لقد اختفى الشاب !

الكاهن الأعظم : متى ؟

الكاهن الأول : اكتشف الحارس ذلك منذ دقائق.

الكاهن الأعظم : (وقفه) لابد أن تجدوه . (إلى توتو) لا يجب

أن يتمكن من الوصول للقصر . (لجميع) لابد من القبض عليه.

الكاهن الثانى: وماذا نفعل به عندما نجده ؟

(وقفه)

الكاهن الأعظم :اقتلوه !

(وقفه)

قلت لكم الخطأ غير مسموح به ، خطأ واحد يعنى موتنا جميعاً .

(يهرع الكاهنان الأول والثانى إلى الخارج)

(صمت)

(إلى توتو) سيجاول هذا الشاب الوصول إلى القصر ، لذا من الأفضل أن تكون فى انتظاره هناك !

(يخرج توتو)

(إلى الكاهن الثالث) أما أنا فساذهب لأرى حورمحب.

الكاهن الثالث :نحن الآن فى منتصف الليل يا سيدى !

الكاهن الأعظم :حورمحب صديق قديم ، وأعرف جيداً كيف ألاعبه .

الكاهن الثالث :هل أذهب معك ؟

الكاهن الأعظم :لا . إبق هنا.

(يغطي نفسه تماماً بالعباءة) تراقب كل شيء.
(وهو يغادر) لا نوم لنا حتى نقضى على هذا
الكافر !

إظلام

المشهد الرابع

توتو وحده في أحد غرف القصر ، يزرع
المكان جيئة وذهابا في قلق وتوتر بالغين.
(يدخل الحارس مندفعاً)

قيضنا عليه يا سيدي.

مين اللي قبضتم عليه ؟

الحارس :

توتو :

الحارس : الشاب . كان بيحوم حوالين القصر . عاوز يقابل

الأمير !

توتو : ما تكلمش عن حاجة ؟ أقصد قال عاوز يقابله

ليه ؟

الحارس : لا هو مصمم إن الأمير يسمع بنفسه .

توتو : هاته .

(يندفع الحارس خارجا)

(لنفسه) عاوز يقابل الأمير !

(وقفه)

(يدخل الحارس دافعا الشاب أمامه)

توتو : (إلى الشاب) إنت عاوز تقابل الأمير ؟

الشاب : أيوه .

توتو : عشان إيه ؟

الشاب : مسألة حياة أو موت .

توتو : (يخطو في اتجاهه) بجد ؟ فيه إيه ؟

الشاب : الأمير لابد يسمعها بنفسه .

(وقفه)

توتو : (في لهجة حادة غاضبة) إنت تعرفني ؟

الشاب : لا يا سيدى .

توتو : أنا رئيس الأمن، تعرف ده معناه إيه؟ معناه إنه
إذا كانت المسألة مسألة حياة أو موت فأنا أول
من يعرف . إنت فاهم الكلام ده ؟
الشاب : فاهم يا سيدى ، بس أسف ، أنا هقول اللي
عندى للأمير .

(صمت)

توتو : إنت مش فاهم حاجة ، (وقفه) اسمعنى كويس .
إنت فاكّر إن إحنا ما نعرفش اللي عندك ؟
عارفينه طبعا ، (وقفه - متأملا تأثير كلماته
على وجه الشاب) كل المصريين بيحبوا
الأمير، لكن كل واحد ف الدنيا له أعداء ، وفيه
قلة حاقدة مجنونة ممكن تتآمر على أميرنا
المحبوب... (ناظرا فى عينيه بحدة) إحنا
عارفين كل حاجة.

الشاب : (مرتبكا) لكن فيه موضوع ثانى خطير .

توتو : (بسرعة) إيه ؟

الشاب : (يتردد ناظرا إلى الحارس) مقدرش و...

يعنى...

(يتوقف)

توتو : (يشير إلى الحارس فيخرج) تقدر تتكلم دلوقتى.
الشاب : (يقترّب كثيرا منه - هامسا) أنا سمعت إن
المتآمرين لهم الراجل بتاعهم فى القصر ، ما
قالوش إسمه لكن بيقلوا هو قريب قوى من
الأمير وإنه ...
توتو : (فى صوت مسرحى عنيف) إنت مجنون ؟ !
عاوز تقول ليه أنا مغفل معرفش حاجة عن اللي
بيجرا حواليا هنا فى القصر ؟!
(صارخا) حرس .. حرس !
(يندفع حارسان إلى المسرح)
(إلى الشاب) إزاي تجرؤ وتتهم واحد من
رجالتي بالخيانة ؟
رجالتي كلهم يفدوا الأمير والوطن بروحهم !
إزاي يجرؤ لسانك ويقول الكلام ده ؟ !
لسانك لابد يتعاقب !
(مشيرا إلى الحراس) إقطعوا لسانه !
(يتحرك الحارسان بسرعة فى إتجاه الشاب الذى
تصيبه الصدمة بفزع شديد ، فيحاول المقاومة ،
لكن الحارسين يتمكنان فى النهاية من قطع

لسانه ، تصدر عن الشاب صرخة ألم ورعب
طويلة)

إظلام

المشهد الخامس

منزل حورمحب . نفس الغرفة ، بعد منتصف
الليل ، تقف زيمات عند النافذة، وفي يدها كأس
تحتسى فيها الخمر، بينما يجلس حورمحب على
الأريكة ويبدو مهموما حائقا.

حور محب: (متكهما) السلام والحب ؟! ... الجمال والصدق؟! .. سلام ... حب ... (فى صوت عال إلى زيمات) جده العظيم أمونحوتيب الثانى مرة قبض على سبع حكام من الولايات المتمردة دى اللى فى الشام، دبحهم كلهم وحط ستة منهم على مركب للناس تنفرج عليهم من الشام لغاية طيبة ، السابع علقه على شجرة فى النوبة عشان يرتجع كل المتمردين ، هو ده اللى عمل الإمبراطورية المصرية، وهو ده اللى أبقى عليها عظيمة وكبيرة!

(وقفة)

دلوقتى إخناتون مفيش على لسانه غير السلام والحب ، كنت فاكركه هيبندى زى جدوده ويلقن المتمردين إزاي يتعاملوا معانا ، أنا قلت له لايد تبعث قواتنا فى الحال !

زيمات: (تلفت إليه ، فى حدة) إصح يا حورمحب ،

الأمير عمره ما بيعت قوات ، إصح !

حورمحب: قصدك إيه ؟!

زيمات: مش هيبيعت قوات ولا هيسمح ليك تقود قوات
أيدا!

حورمحب: (مصدوما) ليه ؟

زيمات: حور محب... جوزى .. المحارب العظيم طفل
برى !

حورمحب: (غاضبا) ليه ؟ فى ايه ؟

(وقفه)

زيمات : أميرك سيتوج غدا ، سيصبح فرعون مصر
العظيم ، لكنه يعرف إنك بطل فى قلوب وعقول
المصريين ، إرسال قوات تقودها إنت هيعلى
صورتك فى عيون المصريين ، عشان كده
عمره ما هيبيعت قوات ، وعمره ما هيقول لك
ليه ومش هتاخذ منه إلا كلامه الفارغ عن
السلام والحب !

حورمحب: (يقف) لا . لا . إختاتون مش كده. إنت ما
تعرفيهوش.

زيمات : عارفاه ... ضعيف وخبيث ، وكلامه عن
السلام والحب مجرد كلام بيدارى بيه ضعفه
وغيرته منك !

حورمحب: (لا يريد أن يصدق ، يتحرك ناحيتها) إنتى مش

فاهماه ، هو طول عمره كده دايما بيتكلم عن السلام والحب.

(لا يجد نفسه قادرا على قولها) ومش ممكن يكون بيغير منى !

زيما: (فى إصرار) لا بيغير منك !

حورمحب: لا . لا . مش ممكن . (مبتعدا عنها) إنتى ما تعرفيهوش.

زيما: فوق يا حورمحب ، إصح قبل ما يضيع كل شئ.

حورمحب: (يعود إليها ، فى ضيق وعصبية) قلت ليكى

إنتى ما تعرفيهوش. (يأخذ منها الكأس) إنتى

شربت كثير. (يضع الكأس على الطاولة ويبدو

مهموما وروحه مضطربة) أنا تعبان . (يطفئ

كل الشموع ما عدا واحدة يتحرك ناحية الباب) عاوز أنام.

(تسمع دقات على الباب)

(ملتفتا) فيه إيه يا ناى ؟

(تدخل الخادمة)

ناى : فيه واحد عاوز يقابلك يا سيدى.
حورمحب: فى ساعة متأخرة زى دى ، مين هو ؟!
ناى : مش عاوز يقول يا سيدى ، بيقول إنه
صديق !

حورمحب: (فى دهشة) صديق !

(وقفة)

(إلى زيمات) أدخلى جوه دلوقتى. (إلى

الخدمة) دخليه.

(يدخل الكاهن الأعظم ، يخلع عبائته ، ويقف

عند الباب)

حورمحب: (بترك ناحيته مندهشا) سيدى الكاهن الأعظم !

(ينحنى ويقبل يده) ظننت أنكم فى طيبة!

الكاهن الأعظم: تركت طيبة منذ أيام قليلة ، كان لايد من ذلك ،

لا أحد يعرف أنى هنا. (وقفة) (فى تهكم)

تعرف إننى لست مدعوا !

حورمحب: هذا أمر يؤسف له سيدى ، ولا أستطيع أن

أفعل شيئا ، ولا يعنى ذلك أننى ناكِر

للجميل، فأنا لم أنس أبدا ما فعلته من أجلى،

اخترتني من دون الجميع لتخصني برعايتك من
البدائية، (في خجل) لكن صدقني يا سيدي ...
الكاهن الأعظم: (في جلال ووقار) أعرف يا بني أن القلب
الشجاع النبيل لا ينسى الأفضال ، وأن صاحب
الطبيعة الخسيسة وحده هو الذي يخجل من ذكر
هذه الأفضال ويحاول نسيانها ، ولا أعتقد أنني
ظننت ولو للحظة أنك قد نسيت الأيام القديمة.
حورمحب: (ما زال في خجل) بالطبع يا سيدي.
الكاهن الأعظم: جئت هنا متخفياً لا لكي أطلب منك خدمة
(وقفه)
(يخطو ناحيته) جئت هنا لكي أشكرك.
حورمحب: (أكثر خجلاً) تشكرني ! على ماذا ؟!
الكاهن الأعظم: الناس يتكلمون عنك وكيف واجهت الأمير في
شجاعة طالبا منه إرسال القوات لنجدة إخواننا
في الشام ، يتحدثون أيضاً عن عزمك ألا
تحضر حفل التتويج ، لأنك غير راض عما
فعله بنا والقرارات التي يعتزم إعلانها غدا.

حورمحب : (مرتكا) طبعاً أنا طلبت منه إرسال القوات، لكن ، بأمانة... أنا لا أعرف شيئاً عن مسألة عدم حضوري حفل التتويج! الكاهن العظيم: ربما يريد منك الناس ألا تحضر ، فأنت أصبحت بطلهم، ويتوقعون منك أن تفعل ما لا يستطيعون ، وهذا ما يمثله البطل للناس! حورمحب: (مبتعداً عنه) سيدى... لا أعرف كيف أقول لك... (يتردد) سيدى... (يتردد) أنا لست هذا الشخص المتدين الذى... الكاهن الأعظم : (مقاطعاً) لكنك رجل الوفاء والانتماء، وهذا ما يحبه المصريون فيك ، يحبون فيك القلب الشجاع النبيل الذى لا يقبل إلا الإخلاص لأصدقائك القدامى.

(وقفة)

اسمع يا بنى ، لقد دمرت معابدنا ، ونهبت ثرواتنا، ولكننى لست هنا للشكوى ، فنحن لم نهزم بعد ، وبعون الآلهة ، لن نهزم ، أنا هنا يا بنى لأننى كما كنت دائماً ومازلت مهتم بنجاحك فى عملك.

حورمحب: لا أفهم.

الكاهن الأعظم: عدم حضورك التتويج قد لا يكون له أهمية أو قد يكون له بعض الأهمية بالنسبة للأمير ، لكنه يعنى الكثير بالنسبة للناس.

حورمحب: كيف ؟

الكاهن الأعظم : لأنك بطلهم الشجاع الرزين. (وقفة ، يخطو ناحيته ، يتوقف ناظرا فى عينيه) لا يجب أن يكون مرتبة قائد الجيوش هى نهاية مطاف طموح بطل الشعب. عدم حضورك التتويج قد لا يعنى شيئا ، لكنه بالتأكيد خطوة حاسمة بالنسبة لمستقبلك ! (يتحرك فى اتجاه الباب) لابد أن أذهب الآن. (واقفا عند الباب) تذكر أننى جئت لك هنا كصديق قديم ، كان دائما مخلصا صادقا معك، (وهو يرتدى العباءة مخفيا وجهه) تصبح على خير.

(يخرج)

حورمحب: (فى دهشة - لنفسه) خطوة حاسمة بالنسبة

لمستقبلى !

(تعود زيمانت)

(إليها) طبعاً سمعت كل شيء !

(وقفه)

زيمات : هتعمل إيه ؟

حورمحب: مش عارف.

زيمات : (فى سرعة) ليه ؟ طبعاً ما ترحش التتويج.

(وقفه)

حورمحب: وهنقول إيه للـ... ؟

زيمات : (مقاطعة) قول إني عيانة وبموت وماقدرتش

تسبني !

حورمحب: (مرتبكة ومهموما يزرع الغرفة جيئة وذهاباً)

لا.لا.

زيمات: (ذاهية إليه) حبيبي حورمحب ، البلد بتغلى

دلوقتي،ومش عارفين أنهى جانب اللي هيكسب،

وعدم مرواحك نصاحه ، وبعدين إيه يعنى لو

ما رحتش ، ولا حاجة ، لا شيء !

زيمات: (تتبعه، وتضع يديها على كتفيه فى دلال) ولا

حاجة يا حورمحب.

حورمحب: إخناتون صديقي.

زيمات:

صديقك عمره ما هيخليك تقود الجيوش يا
حبيبي ،لكن إنت هتكون دايمًا بطل ف عينين
الشعب ،ودايمًا هيجبوك طالما الجيش وراك ،
عشان كده هو غيران منك وعاوز يقضي على
مستقبلك... (تقبل رأسه من الخلف) اللي هينقذ
مصر من اللي بتواجهه دلوقتي إنت ، أيوه إنت
يا حورمحب.

(وقفه)

شكاك .. ملامحك كلها ملامح ملك يا حبيبي!
(يلتفت إليها وعلى وجهه تعبير غريب مزيج
بين الإثارة المكتومة والقلق)
أيوه يا حورمحب، كل ما فيك بيقول إنك هتكون
الفرعون... فرعون مصر!

إظلام

المشهد السادس

قصر إخناتون ، نفس الغرفة ، الملكة الأم
جالسة على الأريكة ويبدو عليها القلق العميق ،
تدخل نفرتيتي والسرور بادی عليها .
نفرتيتي: (تلحظ الملكة الأم) صباح الخير أمى الملكة،
إحنا لابسین ومستعدين وإنت متأخرة كده !
تأى : حاسه إني مش كويسة.
نفرتيتي: (متجهة ناحيتها) خير يا أمى ؟

تأى : ما نمش كويس (لنفسها تقريبا) أحلام وحشة !
نفرتي : أبويا كان دايما يقول أحلامنا هي مخاوفنا
ورغباتنا!
تأى : صح ، بعض الأحلام رؤى بتقول اللي يحصل.
(وقفه)
نفرتي : النهاردة تتويج إخناتون ، ده عيد ولابد نكون
فرحانين يا أمى...
(يدخل إخناتون ، تبدو عليه السعادة والثقة)
إخناتون : (يقبل أمه) صباح الخير يا أمى. (ملتقنا إلى
نفرتي) كل شئ جاهز ؟ هنتحرك حالا.
تأى : (ناظرة إلى ملبسه فى دهشة) هتروح التتويج
بالهدوم دى ؟!
إخناتون : (مبتسما فى هدوء) أيوه يا أمى.
تأى : الناس هتشوف الملك فرعون مصر لأول مرة
ف الهدوم دية ؟
إخناتون : مفيهاش حاجة يا أمى ، خللى الناس تشوف ملك
مصر فى هدوم بسيطة ، وعاش حياة بسيطة ،
خلليهم يعرفوا إني مجرد إنسان زيهم ، وإن كل
الناس سواسية.

تأى : (فى حدة) لا .إننت مش زيهم ، إننت الملك ،

فرعون مصر العظيم، لايد تتزين وتلبس اللى
يثير فى الناس الإجلال والرهية و...

إخنائون: (مازال مبتسما) مش أنا يا أمى... مش أنا.

تأى : أنا أعرف الناس، عقولهم بسيطة وساذجة..عشان

خاطرى يا بنى.. اليس ليس يليق بىك.. إننت

مش زى الناس، إننت حاجة ثانية... (تصرخ

تقريبا) إننت الملك... الفرعون العظيم...

إخنائون: إله مش إنسان ، مش ده اللى عاوزة نقوليه ...

لا يا أمى ، أنا مش إله ، أنا إنسان بسيط

ضعيف والعظمة لله ، الواحد الذى لا إله إلا

هو...

تأى : (تنهض مقاطعة فى غضب) أنا تعبت. (تتحرك

فى اتجاه الباب)عاوزة أرتاح.

نفر تيتى : (تتبعها فى إلحاح) أمى ... هتحضرى حفل

التتويج ؟

تأى : (تلثفت ، فى يأس) مظنش هقدر !

(تخرج)

نفرتي: (تعود ، محاولة الابتسام) النهاردة يوم الفرح.
(تلحظ إشارات الحزن على وجهه) (وقفه)
(متجهة ناحيته) أمي الملكة تعبانة دلوقتي ...
(يدخل ماهو)

ماهو : يقول خادمه أن زوجة القائد مريضة للغاية.

(ينحنى ويخرج) (صمت)

نفرتي: (لنفسها) لا ، مش مريضة ، دي كدبة ، أنا
عارفك كويس يا زيمات . (تتحول إليه وترى
على وجهه ملامح القلق والحزن تتزايد) لا . لا .
يا إخناتون ، مش عاوزاك تكون حزين ، ده
أول يوم شعبك يشوفك (تحضنه) لابد يشوفك
متفائل وسعيد .

إخناتون : (يتحرك في هدوء ناحية منتصف المسرح)

غريبة!

نفرتي: إيه ؟

إخناتون : (وقفه) أنا كنت عارف !

نفرتي: (تتبعه) عارف إيه ؟

إخناتون : كنت عارف إن أمي وحوو محب مش هيبجوا

التتويج.

نفرتي : عرفت إزاي؟
إخنا تون : (في حيرة) الحلم !
نفرتي : حلم إيه ؟
(من على البعد تأتي موسيقى توحى
بالوحدة والخوف ، وانبعاث الأمل)
إخنا تون : رؤيا غريبة شفتها بعد الفجر !
(وقفه)
نفرتي : (في قلق واهتمام) شفت إيه يا إخنا تون ؟
إخنا تون : شفت كأني في سفر ... طريق طويل، وكنت
عاوز أمي و حور محب معايا ... ناديتهم،
وبصيت حواليه ... مالمشهمش ... ناديتهم ...
محدث جوابني وكان لابد أسافر ... طريق
طويل في ليل كأنه سجن ... ناديت ربي بعدها
شفت نفسي في مفترق طرق ومش عارف أنهى
طريق أمشي! ناديت ربي ثاني ...
وتالت ... ورابع ...
(تأتي أصوات التراتيل من على البعد) وبعدين
فجأة شفت أنوار وسمعت تسابيح حلوة جاية من
واحد من الطرق ... (تكتسب ملامح وجهه

غموض محير) مشيت للنور...مشيت للنور...
وشفت ثلاث وجوه جميلة لثلاث شبان، بريحوا
بيه ... قالوا ليه إنهم ولادى!

نفرتي: ولادك !؟

إخناون: أيوة ولادى. (وقفة) ما تكلموش لغتنا بس أنا
فهمت كل كلمة قالوها. وكل الكلام اللي قاله
أتباعهم اللي خدوني ليهم، أيوة .. أتباعهم
خلق كثير كثير ملهش عدد بتسبح ووجهها
للسما منتظرة تشوفه !

نفرتي: تشوف مين !؟

إخناون: (لا يسمعها لاستغراقه فى الحلم) بعدين النور
ملا الدنيا ، مقدرتش أبص لفوق ... النور
عطى الأرض والسما ... إختفينا كنا فى
النور ... أيوه... إختفى الخلق فى النور...
أصبحنا كنا هو... وسمعت النور بيسبح
باسمه ... سمعته بيسبح باسمه ... الله ...

(يتوقف)

(تختفى الترانيل تدريجيا) (صمت)

الحمد لله ، النهاية خير !

نفرتي:

إخناتون : (ملتفتاً إليها) سمعتك بتناديني وبتبكي !
نفرتي : (منزعجة) في الحلم ؟!
إخناتون : أيوة لكن مقدرتش أرد عليكى كأن إنت فى عالم
وأنا فى عالم تانى ! (وقفه) (محاو لا أن يرفع
من روحها) لما صحبت كنت سعيد !
(يدخل توتو)
توتو : (ينحنى) العرض بيدأ الآن يا مولاي. والمركبة
جاهزة.
إخناتون : مفيش داع للمركبة ، (وقفه) قل لميرورا هنروح
سوا.
توتو : (ينحنى ثانية) أمر مولاي. (يدخل بيك ومعه
تمثال صغير مغطى)
بيك : (إلى نفرتي) وهو يكشف عن تمثال لوجه
نفرتي (ده من إبداع مولاي ليكى يا سيدتى...
وجه مولاتى نفرتي).
نفرتي : حلو قوى يا إخناتون ! إمتى عملته ؟
(تتظر ثانية للتمثال وتخطو ناحية إخناتون
وتمسك بيده فى حب)
لا يا إخناتون، أنا مش حلوة كدة !

بيك : (وقفه ، إلى إخناتون) فيه حاجة لايد أبلغها
لمولاي... (يتوقف)
إخناتون : خير .
بيك : صورك يا مولاي شو هوها فى كل مكان
حطيناها فيه !
نفرتيتى : (فى غضب لتوتو) أراى؟ ومين يجرو يعمل
كدة؟!

(وقفه)
توتو : (ينحنى ، فى هدوء) مظنش يا مولاتى إن ده
مقصود .
إخناتون : الكهنة وأتباعهم ورا الكلام ده.
توتو : سنحقق ف ذلك يا مولاي ، لكن المدينة كلها
آمنة كما سترى يا مولاي، والناس الآن منتظرة
عشان تشوف ملكها المحبوب...
(وقفه)
إخناتون : إذن نتوكل على الله.

إظلام

المشهد السابع

الساحة أمام المعبد ، الجمهور ينتظر ظهور
إخناتون ، وتسمع أصوات الموسيقى والطبول...
ينتشر الكهنة وأتباعهم بين الجمهور يترقبون
في قلق شديد مجئ إخناتون.
أعلى المسرح يدخل رجلان ويتوجهاً إلى
الجمهور .

- الرجل ١ : ده غضب الآلهة .
الرجل ٢ : عشان المعابد اللي هدمناها .
الرجل ١ : عمرنا ما شغنا فيضان زى ده ، المطر والرعد والبرق موقوفش طول ليلة أمبارح!
الرجل ٢ : فعلا ده غضب الآلهة ... دى نهاية العالم!
الرجل ١ : (ناظرا حواليه) هس !
الرجل ٢ : (فى استهتار وتحريض) معادش فيها سكوت ، هيعملوا فينا أكثر من كده إيه ؟ الناس نفسيتها فى الأرض ، أكيد دى لعنة الآلهة ، (فى تهكم) سمعت إنه هيعلن الدين الجديد دلوقتى ! (فى صوت عال حتى يسمعه الآخرون) مفيش فرعون حقيقى يسبب دين أبوه !
(الجمهور حول الرجلين يهيمهم)
(فى سخرية) الإله الجديد مينشفوش ، عشان مالهش شكل ولا صورة ! بس الحقيقة بيحبنا ، ومبيغضبش أبداً ولا بيجير من الآلهة التانية ، والدليل إن الكاهن الأعظم أقتل بأوامر من إخناتون ، عشان إله الحب والسلام بتاعه ينسبط!)

(تترايد همهمة الجمهور في فزع وعصبية)

(وقفة)

- الرجل ٣ : (إلى جاره) إنت سمعت ؟!
- الرجل ٤ : هس . الجواسيس في كل مكان !
- (يدخل إخناتون ، نفرتي ، وتوتو وميرورا ،
يتبعهم حارس يحمل التاج . والثلاثة حراس)
(ترتفع الصيحات بينما يتحرك الثلاثة حراس
في حرص ليحيطوا بإخناتون في دائرة)
- الرجل ٤ : (هامسا) آمال فين الفرعون ؟
- الرجل ٣ : اللي بين الحراس .
- الرجل ٤ : (في دهشة) هو لابس كده ليه ؟ لا . لا . إنت
متأكد إن ده الفرعون ؟!
- الرجل ٣ : هس ...
- إخناتون : (ناظرا إلى بعض الوجوه في الصف الأول ،
يلتفت إلى نفرتي)(الوجوه دي غريبة مبحهاش ،
وشفتها قبل كده!
- نفرتي : فين ؟
- إخناتون : في الحلم !

توتو : (إلى إخناتون) هل نبدأ يا مولاي ؟

(إخناتون يومئ إلى ميرورا)

ميرورا: (يخطو إلى الأمام ويلتفت ليوافق الجمهور ، في صوت عال للناس) نحتفل اليوم بتتويج ملكنا المحبوب ، إنه حقاً ليوم عظيم في تاريخ مصر ، يوم تستحقه مصر والمصريون لأنهم أعطوا العالم المعرفة والحكمة ، إنهم الذين أقاموا الحضارة التي تقود العالم اليوم . اليوم يعلن ملكنا المحبوب إخناتون بنفسه القوانين والأوامر التي تكرم ووافق عليها ، هذه القواعد والأوامر تعتبر بحق خطوة هامة في حضارة الإنسان ، خطوة سنضع نهاية للظلم وتحقق العدل والسلام والحب خطوة ستجعل من كل الناس إخوة ، وليس آلهة وعبيد ، لكنها أيضاً خطوة ستجعل الناس ، كل الناس عبيداً لإله واحد ، وهو الله سبحانه وتعالى.

(وقفه ، تسمع همهمة الناس)

لأجل هذا اختار ملكنا المحبوب أن يكون
تتويجه بكم وبينكم أيها الشعب ، وعلى بركة الله
الواحد القادر .

(وقفه - يؤمئ إلى الحارس الذى يحمل
الناج) تبدأ أولاً بالتتويج . (ينحنى إلى إخناتون
الذى يخطو إلى منتصف المسرح)

الرجل ١ : (يقف ، صارخاً من بين الجمهور) إنت بتتكلم
عن السلام والحب ، وأنا أخويا عذيوه وضربوه
لغاية ما مات فى أيدين رجالة إخناتون !

إخناتون : (إلى الرجل) مش ممكن يحصل. لا !

الرجل ١ : (فى تصميم) حصل . عساكرك ربطوه عريان
على عمود وقعدوا يضربوه لغاية ما انتهى ،
(ناظراً إلى رفاقه الآخرين فى نظرة ذات
معنى) حصل وأخويا مش أول واحد بتعذب
لغاية ما يموت ، فيه كثير زيه !

آخرون : (يقفون ، فى صوت واحد) حصل ، أيوة
حصل.

توتو : (فى هدوء إلى إخناتون) سوف نحقق ف هذا يا

مولاي.

(للآخرين بصوت عال) هاتوا أسماء اللى

انضربوا واتعدبوا لغاية ما ماتوا ، إتفضلوا ،

تعالوا هنا.

(يتحرك الكهنة الثلاثة وأتباعهم فى شكل منظم

إلى ناحية المسرح ، بينما يضيق الثلاثة حرسا

الخناق حول إخناتون)

(يرى الكهنة وأتباعهم يقتربون من المسرح

ميرورا :

فيخطوا إلى الأمام ليواجههم) مكانك إنت وهو !

(يقتربون أكثر) أنا قلت مكانك ... مكانك إنت

وهو... (يطعنه من الخلف واحد من الحراس

الثلاثة فيسقط)

(صارخا فى عنف) ميرورا !

إخناتون :

(يتحول إلى الحارس لكن الحارسين الآخرين

يمسكان به فى عنف ليجبراه على الخروج

معهما)

(مصدوما) فيه إيه ؟ بتعمل إيه إنت وهو ؟!

إخناتون :

(يدفعه بقسوة الحارسان للخروج) سييونى...

شيل إيدك (يحاول بلا حدود أن يتحرر منهما-

صارخا) سيونى !

نفرتي : (مصدومة تحاول الوصول إلى إختاتون ، لكن

الحرس يمنعونها ، فى جنون يائس) سييوه !

سييوه يا جينا ! ليه بتعملوا كده فيه ، سييوه !

(تحاول الوصول إليه فيدفعونها إلى الخلف .

تسقط على ركبتيها وهى ترى إختاتون يؤخذ

إلى الخارج ، صارخة) لا . لا . مش ممكن ،

مش ممكن تعملوا فيه كده يا جينا ! مش ممكن!

لا . لا . لا !

الكاهن الثانى: (ناظرا إلى جسد ميرورا على الأرض

والجمهور الذى يهرب فزعا ، إلى الكاهن

الثالث) الناس مرعوبة بتهرب!

الكاهن الأعظم : (يخلع عبائته التى كان متخفيا فيها مندسا

بين الناس محدش يهرب، ما تخافوش!

ما تخافوش!

(مازال الجمهور يهرب فزعا) ليه ... ليه ؟!

(إلى الكاهنين والأتباع) قولوا لهم محدش

يخاف. (يتجه إلى منتصف المسرح، ويواجهه

الجمهور) قولوا لهم فعلنا هذا لنحميكم. فعلنا هذا
من أجلكم ، من أجل أن تعيشوا فى أمن وسلام.
فعلنا هذا من أجل آلاف السنين من الحضارة
والتقدم. فعلنا هذا من أجلكم وأجل أهلكم...
نعم...فعلنا هذا من أجلكم ومن أجل أهلكم!

إِظْلام

المشهد الثامن

كهف فى الجبل ، يسود الظلام المسرح ، غير
أنه يمكن رؤية إخناتون مقيدا بالحبال إلى
صخرة أسفل يمين المسرح... أعلى يمين
المسرح يرقد الشاب فاقد الوعي فى حالة بئسة
يرثى لها....

أسفل يسار المسرح يقف الكاهن الأعظم مفكرا،
بينما يقف حوله الكهنة الثلاثة فى توتر بالغ
ينظرون إلى إخناتون الذى يبدو مرفقا
مصدوما...تأتى من على البعد موسيقى الحلم
ومعها أصداء صرخات ونحيب نفرتيتى...

الكاهن الأعظم: (يلتفت متطلعا إلى حيث تأتي الصرخات

والنحيب) ما هذا ؟

الكاهن الأول: نفرتيتي تجوب الشوارع باكية تبحث عنه.

(وقفه)

الكاهن الثالث: (ينظر أعلى المسرح فشاهد أسنة النار والدخان)

المدينة تتحرق ! الوقت ليس في صالحنا يا

مولانا.

(وقفه)

الكاهن الأعظم: (يتجه ناحية إخناتون ، ويقف أمامه ، ينحني،

في لهجة مسرحية) أقدم اعتذارى لمولاي لأنني

لم أتمكن من حضور حفل تتويجكم ، كنت أود

الحضور لكنكم لم تدعوني ، كان حفلا عظيما ،

يا خسارة ، لم أره !

إخناتون: (ينهض في بطن ليقف على قدميه ، في تصميم

وإرادة قوية) مش هتقلت من العقاب على اللي

عملته ده.

الكاهن الأعظم: (كأنه لم يسمعه) كان حفلا عظيما ، لكن بأمانة

لم يعجبني ، لأنه لم يكن حقيقي وشرعي، وأنا

أحب الحقيقي والشرعي، كنا نود تتويجك في

معابدنا مع بركات آلهتنا...مثل أبيك وأجدادك ..
الفراعة العظام...لقد كانوا آلهة عظيمة ، كنا
نود أن نجعلك مثلهم... الفرعون الإله ، لكنك،
وللأسف ، خذلتنا يا مولاي ! لماذا ؟ لماذا؟
إخناثون: (صارخا) إنت أعمى، مفيش آلهة، خالق الكون
واحد هو الله ! ...

الكاهن الأعظم:(مقاطعاً فى حدة) مازلت تحلم! (يتوقف، يزرع
المكان جينة وذهابا ، ثم يتوقف ، ملثقتا إليه)
هناك آلهة وستظل هذه الآلهة موجودة دائماً وأبداً.
آمون ، رع سبت ، سوتبخ ، بال ، إشتار آلهة ،
جدودك وجدود جدودك الفراعة العظام كانوا
آلهة، وسيكون هناك دائماً فراعة. (متجها إليه)
هل تعرف لماذا ؟ لأن الناس يحتاجون فراعة ،
هذا هو العقد والاتفاق منذ بداية الحياة ، ولن
يستطيع أحد تغيير ذلك ! الآلهة هم الشرعية
والقوة التى تقدم الأمن والحماية لكل المواطنين .
إخناثون: مواطنين ؟ تقصد العبيد، إنتم بتخلقوا آلهة
علشان تستعبدوا الناس ، وعلشان تبرروا الظلم

والفساد ، الناس خلقها ربنا حرة يا رببتنا ،
الناس...

الكاهن الأعظم: الناس !! أين هؤلاء الناس الذين نتحدث عنهم ؟
ماذا فعلوا من أجلك ، لقد هربوا من مدينتك
وتركوك وحيدا ، لقد هربوا جميعا... (ناظرا إلى
الشباب ، فى سخرية) ما عدا هذا الشاب
الأحمق!

(وقفه)

وأين إلهك الواحد، أين هو؟ لماذا تركك وحيدا ؟
إخناتون: لا . ربى لم يتركنى ، أنا رسوله، ومش هيتخلى
عنى... (ينتنفض جسمه وهو يصرخ كلماته
كأنها رفيقه الذى لم يتركه بعد) لم يتركنى ربى
أبدا ، لا، أنا مش لوحدى، أبوة ... أنا مش
لوحدى !!! هو معايا !

(تسمع الآن وبوضوح ترانيل وتساييح الحطم
الذى يعيشه إخناتون فى استغراق كامل)
الكاهن الأعظم : (فى هدوء) نحن الآن فى مفترق طرق ،
أمامك طريقين: طريقك ، ولقد وصلنا كما ترى
إلى نهايته ، ثم طريقنا... وطريقنا مازال أمامك

مفتوحا، لازلت تستطيع أن تكون فرعون مصر
العظيم ، سنذهب إلى طيبة ونتوجه في
معابدها، وسنقول للناس أن الذى ظهر فى هذه
المدينة لم يكن أنت ... لم يكن الفرعون
الحقيقى...

(وقفه)

ماذا نقول ؟

إخناتون : لا. مش محتاج أكاذيبك !

الكاهن الأعظم: بمناسبة الأكاذيب ، كانت هناك ملكة عظيمة،
لكنها للأسف عاقر ، وتمنت أن يكون لها ولدا
للعرش ، ساعدناها وصنعنا معها كذبة !

إخناتون : إبت بتكلم عن إيه ؟

الكاهن الأعظم :عن الأكاذيب ، عنك !

إخناتون : أنا إخناتون ، أمير...

الكاهن الأعظم : نعم أنت إخناتون وأمير (يقترّب منه ناظرا
فى عينيه فى تحد) ولكنك لست ابن
الفرعون العظيم آمون حوتب .

إخناتون : (يحاول التماسك لكن روحه تنهار)كذاب فاسد !

الكاهن الأعظم : (مقاطعا) لا. لست كاذبا، الملكة تاي تعرف الحقيقة. (يرى تأثير كلماته على وجه إخناتون)
لست كاذبا... إعط نفسك الوقت وانظر في ما
أعرضه عليك ، أنا أعرض عليك الكثير ،
وأنت لا تملك شيئا ... نعم لا تملك شيئا... يا
مولاي ! لقد انتهى الحم... أصبح يا مولاي !
(يعود إلى حيث ينتظر الكهنة الثلاث في توتر)
الكاهن الثالث: (هامسا إلى الكاهن الأعظم في نفاذ صبر) ليس
لدينا خيار يا سيدى ، سوف نموت جميعا ونفقد
كل شئ إذا ما تركناه يعيش !

الكاهن الثانى: نعم سيدى الكاهن الأعظم، ليس لدينا خيار !
(وقفه)

الكاهن الأعظم : (ناظرا إلى إخناتون فى ابتسامة واثقة) إنه
يحتاج بعض الوقت ، لكنه فى النهاية سيقبل ما
نعرضه عليه .

(خارجا يتبعه الكهنة الثلاثة) فى الصباح يكون
كل شئ على ما يرام.

(صمت)

(تصدر عن الشاب أنات ألم)

إخنائون:

(مصدوما، تتصارع فى عقله الذكريات ، لنفسه)
أمى الملكة عارفة .. أمى الملكة..لا ..هى مش
أمى..ولا هو أبويا! (وقفه) أمال أنا أبقى مين؟
مين أنا؟ ..حلم؟! أيوة حلم... حلم انتهى ما
عادش فهي غير الهوان والذل ! لا . لا . لا !
ربى ... يا رب... إنت فين ؟

(وقفه)

أنا وحدى مغلوب على أمرى ومعادش فيه
غير الهوان ! أنا وحدى يا رب ، مفيش معاينة
حد! إنت فين ! إنت فين يا رب ؟! موجود ...
أيوة ... أيوة... إنت موجود... موجود يا رب
خد بإيدى ... خد بإيدى وساعدنى يا رب!...
يمكن صحيح أنا مش ابنهم، بس أنا حلمى
حقيقى وانت عارف يا رب،لأن إنت الحق ...
(صارخا) يا رب !

(يعلو أنين الشاب بعد أن استعاد وعيه)

(إلى الشاب ملتفتا إليه) أنا آسف !

(يقف الشاب مفزوعا ويخرج من بين طيات

ملابسه خنجرا)

أسف، على الى عملوه فيك ... أسف ...
ماكنتش أقصد. ما كنتش أعرف إن الحلم
هينتهى كده ... أنا ماكنتش عاوز أبني هرم
لنفسى، أنا كنت عاوز أخللى كل مصرى ببقى
هو نفسه هرم... كنت عاوز أحرر المصريين
من أنفسهم، كنت عاوزهم يؤمنوا بالله الواحد
لأن عمرهم ما ها يخافوا من بعض ولا
يستعبدوا بعض لو آمنوا وخافوا رب واحد قادر
بس للأسف ما يعرفوش مع إنها بسيطة مش
محتاجة نبى عشان يفهمها! ... (وقفة) (ناظرا
إلى الشاب فى رثاء حزين) أنا أسف...
سامحنى.

(يخطو الشاب إلى إخناتون، يركع مقبلا يديه
باكيا ما تعيطش ولادى جاينين، أنا شايفهم
جاينين! .. جاينين!
(يحول وجهه إلى ناحية التسابيح التى تأتى من
على البعد)

جايين...المؤمنين جايين...حلمنا هيبقى
حقيقة...جايين... ما تعيطش (محاولا أن يتحكم
فى دموعه هو الآخر) إحنا مش لوحدها...
(مستخدما الإشارات يقول الشاب أنه مستعد
للدفاع عن إختائون والذود عنه مستخدما
خنجره)

إنت عاوز تدافع عنى ؟

(يومئ الشاب بنعم) (صمت)

(كمن قرر شيئاً ، محاولاً أن يستجمع شجاعته)
أيوه... ممكن تدافع عنى، الخنجر اللي فى
إيدك ده ممكن يحمى حلمنا من الهوان ...
أيوه ...

(يرتعد الشاب من الفكرة ، فيجربى إلى
الزاوية دافنا رأسه بين يديه ، يبكى ويهز
رأسه رافضاً) (صمت)

إنت مؤمن ؟

(يومئ الشاب بنعم)

المؤمن ما يخافش الموت ، المؤمن ما
بيخافش حاجة ولا يرضى الهوان لنفسه أو
لدينه ... إنت سامعنى ؟
(فى عصية بالغه يهز رأسه رفضاً)
(وقفه)

اسمعنى... ده مش هروب ، إحنا مش
جبنا، إحنا مؤمنين ، وده طريقنا عشان
نحمى حلمنا من الهوان ، عشان يظل حلمنا
عايش للأبد ...

(وقفه)
ما تخافش ... تعال ... إنت وأنا شفتنا كتير
عشان حلمنا، لكن ما عايش إلا الهوان... تعال !
(وقفه)

حلم المؤمنين شجاع وحر ، أنت وأنا نحميه
من الهوان ! تعال. تعال... ما تخافش ...
تعال...
حلمنا هيبطل دايماً شجاع وحر ... أيوه ...
شجاع وحر ! تعال... تعال.

(فى بطئ يتحرك الشاب وفى يده الخنجر
ناحية إخناتون...)

إِظْلام

نهاية المسرحية

دار التيسير للطباعة بالمنيا